

四庫全書薈要

• 乾隆御覽本

史部

欽定四庫全書薈要

史部


通鑑紀事本末卷四十中



通鑑紀事本末卷四十中

宋 袁樞 撰

後唐滅梁一

唐昭宗天祐元年夏閏四月更命魏博曰天雄軍進天雄節度使長沙郡王羅紹威爵鄴王

昭宣帝天祐二年七月庚午夜天雄牙將李公佺與牙軍謀亂羅紹威覺之公佺焚府舍剽掠奔滄州

三年 初田承嗣鎮魏博選募六州驍勇之士五千人

爲牙軍厚其給賜以自衛爲腹心自是父子相繼親黨  
膠固歲久益驕橫小不如意輒族舊帥而易之自史憲  
誠以來皆立於其手天雄節度使羅紹威心惡之力不  
能制朱全忠之圍鳳翔也紹威遣軍將楊利言密以情  
告全忠欲借其兵以誅之全忠以事方急未暇如其請  
陰許之及李公全作亂紹威益懼復遣牙將臧延範趣  
全忠全忠乃發河南諸鎮兵七萬遣其將李思安將之  
會魏鎮兵屯深州樂城聲言擊滄州討其納李公全也

會全忠女適紹威子廷規者卒全忠遣客將馬嗣勲實  
甲兵於橐中選長直兵千人爲擔夫帥之入魏詐云會  
葬全忠自以大軍繼其後云赴行營牙軍皆不之疑

正月庚午紹威潛遣人入庫斷弓弦甲襪是夕紹威  
帥其奴客數百與嗣勲合擊牙軍牙軍欲戰而弓甲皆  
不可用遂闔營殪之凡八千家嬰孺無遺詰旦全忠引  
兵入城羅紹威旣誅牙軍魏之諸軍皆懼紹威雖數  
撫諭之而猜怨益甚朱全忠營於魏州城東數旬將北

巡行營會天雄牙將史仁遇作亂聚衆數萬據高唐自稱留後天雄巡內州縣多應之全忠移軍入城遣使召行營兵還攻高唐至厯亭魏兵在行營者作亂與仁遇相應元帥府左司馬李周燾右司馬符道昭擊之所殺殆半進攻高唐克之城中兵民無少長皆死擒史仁遇鋸殺之先是仁遇求救於河東及滄州李克用遣其將李嗣昭將三千騎攻邢州以救之時邢州兵纔二百團練使牛存節守之嗣昭攻七日不克全忠遣右長直都

將張筠將數千騎助存節守城筠伏兵於馬嶺擊嗣昭  
敗之嗣昭遁去義昌節度使劉守文遣兵萬人攻貝州  
又攻冀州拔薊縣進攻阜城時鎮州大將王釗攻魏州  
叛將李重霸於宗城全忠遣歸救冀州滄州兵去四月  
丙午重霸棄城走汴將胡規追斬之 五月丁巳朱  
全忠如洺州遂巡北邊視戎備還入于魏 秋七月

朱全忠克相州時魏之亂兵散據貝博瀘相衛州及魏  
之諸縣全忠分命諸將攻討至是悉平之引兵南還全

忠留魏半歲羅紹威供億所殺牛羊豕近七十萬資糧稱是所賂遺又近百萬比去蓄積爲之一空紹威雖去其逼而魏兵自是衰弱紹威悔之謂人曰合六州四十縣鐵不能爲此錯也壬申全忠至大梁八月朱全忠以幽滄相首尾爲魏患欲先取滄州甲辰引兵發大梁九月辛亥朔朱全忠自白馬渡河丁卯至滄州軍於長蘆滄人不出羅紹威饋運自魏至長蘆五百里不絕於路又建元帥府舍於魏所過驛亭供酒饌幄幕什



器上下數十萬人無一不備 劉仁恭救滄州戰屢敗  
乃下令境內男子十五以上七十以下悉自備兵糧詣  
行營軍發之後有一人在閭里刑無赦或諫曰今老弱  
悉行婦人不能轉餉此令必行濫刑者衆矣乃命勝執  
兵者盡行文其面曰定霸都士人則文其腕或臂曰一  
心事主於是境內士民孺孺之外身無不文者得兵十  
萬軍於瓦橋時汴軍築壘圍滄州烏鼠不能通仁恭畏  
其彊不敢戰城中食盡丸土而食或互相掠啖朱全忠

使人說劉守文曰援兵勢不相及何不早降守文登城應之曰僕於幽州父子也梁王方以大義服天下若子叛父而來將安用之全忠愧其辭直爲之緩攻 冬

十月劉仁恭求救於河東前後百餘輩李克用恨仁恭反覆竟未之許其子存勗諫曰今天下之勢歸朱溫者什七八雖彊大如魏博鎮定莫不附之自河以北能爲溫患者獨我與幽滄耳今幽滄爲溫所困我不與之併力拒之非我之利也夫爲天下者不顧小怨且彼嘗困

我而我救其急以德懷之乃一舉而名實附也此乃吾復振之時不可失也克用以爲然與將佐謀召幽州兵與攻潞州曰於彼則可以解圍於我則可以拓境乃許仁恭和召其兵仁恭遣都指揮使李溥將兵三萬詣晉陽克用遣其將周德威李嗣昭將兵與之共攻潞州

十二月朱全忠分步騎數萬遣行軍司馬李周彝將之自河陽救潞州 初昭宗凶訃至潞州昭義節度使丁會帥將士縞素流涕久之及李嗣昭攻潞州會舉軍

降於河東李克用以嗣昭爲昭義留後會見克用泣曰  
會非力不能守也梁王陵虐唐室會雖受其舉拔之恩  
誠不忍其所爲故來歸命耳克用厚待之位於諸將之  
上己巳朱全忠命諸軍治攻具將攻滄州壬申聞潞州  
不守甲戌引兵還先是調河南北芻糧水陸輸軍前諸  
營山積全忠將還命悉焚之煙炎數里在舟中者鑒而  
沉之劉守文使遺全忠書曰王以百姓之故赦僕之罪  
解圍而去王之惠也城中數萬口不食數月矣與其焚

之爲煙沉之爲泥願乞其所餘以救之全忠爲之留數  
圍以遺之滄人賴以濟河東兵進攻澤州不克而退  
後梁太祖開平元年春正月辛巳梁王休兵于貝州  
河東兵猶屯長子欲窺澤州王命保平節度使康懷貞  
悉發京兆同華之兵屯晉州以備之 三月甲辰唐

昭宣帝禪位于梁

夏四月壬戌梁王卽皇帝位

乙亥下制削奪李克用官爵

五月壬辰命保平節

度使康懷貞將兵八萬會魏博兵攻潞州

六月康

懷貞至潞州晉昭義節度使李嗣昭副使李嗣弼閉城拒守懷貞晝夜攻之半月不克乃築壘穿蚰蜒塹而守之內外斷絕晉王以蕃漢都指揮使周德威爲行營都指揮使帥馬軍都指揮使李嗣本馬步都虞候李存璋先鋒指揮使史建瑋鐵林都指揮使安元信橫衝指揮使李嗣源騎將安金全救潞州嗣弼克脩之子嗣本本姓張建瑋敬思之子金全代北人也晉兵攻澤州帝遣左神勇軍使范居實將兵救之秋八月晉周德

威壁于高河康懷貞遣親騎都頭秦武將兵擊之武敗  
丁巳帝以亳州刺史李思安代懷貞爲潞州行營都統  
黜懷貞爲行營都虞候思安將河北兵西上至潞州城  
下更築重城內以防奔突外以拒援兵謂之夾寨調山  
東民饋軍糧德威日以輕騎抄之思安乃自東南山口  
築甬道屬於夾寨德威與諸將互往攻之排牆填塹一  
晝夜間數十發梁兵疲於奔命夾寨中出芻牧者德威  
輒抄之於是梁兵閉壁不出 冬十一月晉王命李

存璋攻晉州以分上黨兵勢 十二月壬戌詔河中

陝州發兵救之 丁卯晉兵寇洛州

二年春正月晉王珣發於首病篤周德威等退屯亂柳  
晉王命其弟內外蕃漢都知兵馬使振武節度使克寧  
監軍張承業大將李存璋吳珙掌書記盧質立其子晉  
州刺史存勗爲嗣曰此子志氣遠大必能成吾事爾曹  
善教導之辛卯晉王謂存勗曰嗣昭厄於重圍吾不及  
見矣俟葬畢汝與德威輩速竭力救之又謂克寧等曰



以亞子累汝亞子存勗小名也言終而卒克寧綱紀軍府中外無敢誼譁克寧久總兵柄有次立之勢時上黨圍未解軍中外以存勗年少多竊議者人情恟恟存勗懼以位讓克寧克寧曰汝冢嗣也且有先王之命誰敢違之將吏欲謁見存勗存勗方哀哭久未出張承業入謂存勗曰大孝在不墜基業多哭何爲因扶存勗出襲位爲河東節度使晉王李克寧首帥諸將拜賀王悉以軍府事委之以李存璋爲河東軍城使馬步都虞候先

王之時多寵借胡人及軍士侵擾市肆存璋旣領職執

其尤暴橫者戮之旬月間城中肅然 李思安等攻潞

州久不下士卒疲弊多逃亡晉兵猶屯余吾寨帝疑晉

王克用詐死欲召兵還恐晉人躡之乃議自至澤州應

接歸師且召匡國節度使劉知俊將兵趣澤州 三

月壬申朔帝發大梁丁丑次澤州辛巳劉知俊至壬午

以知俊爲潞州行營招討使 帝以李思安久無功亡

將校四十餘人士卒以萬計更閉壁自守遣使召詣行

在甲午削思安官爵勒歸本貫充役斬監押楊敏貞晉  
李嗣昭固守踰年城中資用將竭嗣昭登城宴諸將作  
樂流矢中嗣昭足嗣昭密拔之座中皆不覺帝數遣使  
賜嗣昭詔諭降之嗣昭焚詔書斬使者帝留澤州旬餘  
欲召上黨兵還遣使就與諸將議之諸將以爲李克用  
死余吾兵且退上黨孤城無援請更留旬月以俟之帝  
從之命增運芻糧以饋其軍劉知俊將精兵萬餘人擊  
晉軍斬獲甚衆表請自留攻上黨車駕宜還京師帝以

關中空虛慮岐人侵同華命知俊休兵長子旬日退屯

晉州俟五月歸鎮 初晉王克用卒周德威握重兵在

外國人皆疑之晉王存勗召德威使引兵還 夏四

月辛丑朔德威至晉陽留兵城外獨徒步而入伏先王

柩哭極哀退謁嗣王禮甚恭衆心由是釋然 夾寨奏

余吾晉兵已引去帝以爲援兵不能復來潞州必可取

丙午自澤州南還壬子至大梁梁兵在夾寨者亦不復

設備晉王與諸將謀曰上黨河東之藩蔽無上黨是無

河東也且朱溫所憚者獨先王耳聞吾新立以爲童子  
未閑軍旅必有驕怠之心若簡精兵倍道趣之出其不  
意破之必矣取威定霸在此一舉不可失也張承業亦  
勸之行乃遣承業及判官王緘乞師於鳳翔又遣使賂  
契丹王按巴堅求騎兵岐王衰老兵罷財竭竟不能應  
晉王大閱士卒以前昭義節度使丁會爲都招討使甲  
子帥周德威等發晉陽 己巳晉王軍于黃碾距上黨  
四十五里 五月辛未朔晉王伏兵三垂岡下詰旦

大霧進兵直抵夾寨梁軍無斥候不意晉兵之至將士  
尚未起軍中驚擾晉王命周德威李嗣源分兵爲二道  
德威攻西北隅嗣源攻東北隅塹塹燒寨鼓譟而入梁  
兵大潰南走招討使符道昭馬倒爲晉人所殺失亡將  
校士卒以萬計委棄資糧器械山積周德威等至城下  
呼李嗣昭曰先王已薨今王自來破賊夾寨賊已去矣  
可開門嗣昭不信曰此必爲賊所得使來誑我耳欲射  
之左右止之嗣昭曰王果來可見乎王自往呼之嗣昭

見王白服大慟幾絕城中皆哭遂開門初德威與嗣昭  
有隙晉王克用臨終謂晉王存勗曰進通忠孝吾愛之  
深今不出重圍豈德威不忘舊怨邪汝爲吾以此意諭  
之若潞圍不解吾死不瞑目進通嗣昭小名也晉王存  
勗以告德威德威感泣由是戰夾寨甚力旣與嗣昭相  
見遂歡好如初康懷貞以百餘騎自天井關遁歸帝聞  
夾寨不守大驚旣而歎曰生子當如李亞子克用爲不  
亡矣至如吾兒豚犬耳詔所在安集散兵周德威李存

璋乘勝進趣澤州刺史王班素失人心衆不爲用龍虎  
統軍牛存節自西都將兵應接夾寨潰兵至天井關謂  
其衆曰澤州要害地不可失也雖無詔旨當救之衆皆  
不欲曰晉人勝氣方銳且衆寡不敵存節曰見危不救  
非義也畏敵彊而避之非勇也遂舉策引衆而前至澤  
州城中人已縱火誼譟欲應晉王班閉牙城自守存節  
至乃定晉兵尋至緣城穿地道攻之存節晝夜拒戰凡  
旬有三日劉知俊自晉州引兵救之德威焚攻具退保



高平晉王歸晉陽休兵行賞以周德威爲振武節度使  
同平章事命州縣舉賢才黜貪殘寬租賦撫孤窮伸冤  
濫禁姦盜境內大治以河東地狹兵少乃訓練士卒令  
騎兵不見敵無得乘馬部分已定無得相踰越及留絕  
以避險分道並進期會無得差晷刻犯者必斬故能兼  
山東取河南由士卒精整故也潞州圍守歷年士民  
凍餓死者大半市里蕭條李嗣昭勸課農桑寬租緩刑  
數年之間軍城完復壬辰夾寨諸將詣闕待罪皆赦

之帝賞牛存節全澤州之功以爲六軍馬步都指揮使  
六月帝欲自將擊潞州丁卯詔會諸道兵 秋

九月晉周德威李嗣昭將兵三萬出陰地關攻晉州刺史徐懷玉拒守帝自將救之丁丑發大梁乙酉至陝州  
周德威等聞帝將至乙未退保隰州 冬十月丁巳

帝還大梁

三年春三月以山南東道節度使楊師厚兼潞州行營

四面招討使

秋八月岐王約晉王使攻晉絳晉王

引兵南下先遣周德威等將兵出陰地關攻晉州刺史  
邊繼威悉力固守晉兵穿地道陷城二十餘步城中血  
戰拒之一夕城復成詔楊師厚將兵救晉州周德威以  
騎扼蒙阮之險師厚擊破之進抵晉州晉兵解圍遁去  
四年 鎮定自帝踐阼以來雖不輸常賦而貢獻甚勤  
會趙王鎔母何氏卒庚申遣使弔之且授起復官時鄰  
道弔客皆在館使者見晉使歸言於帝曰鎔潛與晉通  
鎮定勢強終恐難制帝深然之 冬十月遣鎮國節

度使楊師厚相州刺史李思安將兵屯澤州以圖上黨

十一月己丑以寧國節度使同平章事王景仁充

北面行營都指揮招討使潞州副招討使韓勍副之以

李思安爲先鋒將趣上黨尋遣景仁等屯魏州楊師厚

還陝上疑趙王鎔貳於晉且欲因鄴王紹威卒除移

鎮定會燕王守光發兵屯涑水欲侵定州上遣供奉官

杜廷隱丁延徽監魏博兵三千分屯深冀聲言恐燕兵

南寇助趙守禦又云分兵就食趙將石公立戍深州白

趙王鎔請拒之鎔遽命開門移公立於外以避之公立  
出門指城而泣曰朱氏滅唐社稷三尺童子知其爲人  
而我王猶恃姻好以長者期之此所謂開門揖盜者也  
惜乎此城之人今爲虜矣梁人有亡奔真定以其謀告  
鎔者鎔大懼又不敢先自絕但遣使詣洛陽訴稱燕兵  
已還與定州講和如故深冀民見魏博兵入奔走驚駭  
乞召兵還上遣使詣真定慰諭之未幾廷隱等閉門盡  
殺趙戍兵乘城拒守鎔始命石公立攻之不克乃遣使

求援於燕晉鎔使者至晉陽義武節度使王處直使者亦至欲共推晉王爲盟主合兵攻梁晉王會將佐謀之皆曰鎔久臣朱溫歲輸重賂結以昏姻其交深矣此必詐也宜徐觀之王曰彼亦擇利害而爲之耳王氏在唐世猶或臣或叛况肯終爲朱氏之臣乎彼朱溫之女何如壽安公主今救死不贍何顧婚姻我若疑而不救正墮朱氏計中宜趣發兵赴之晉趙叶力破梁必矣乃發兵遣周德威將之出井陘屯趙州鎔使者至幽州燕王

守光方獵幕僚孫鶴馳詣野謂守光曰趙人來乞師此  
天欲成王之功業也守光曰何故對曰比常患其與朱  
溫膠固溫之志非盡吞河朔不已今彼自爲讎敵王若  
與之併力破梁則鎮定皆歛衽而朝燕矣王不早出師  
但恐晉人先我矣守光曰王鎔數負約今使之與梁自  
相獎吾可以坐承其利又何救焉趙使者交錯於路守  
光竟不爲出兵自是鎮定復稱唐天祐年號復以武順  
爲成德軍司天言來月太陰虧不利宿兵於外上召王

景仁等還洛陽十二月己未上聞趙與晉合晉兵已屯

趙州乃命王景仁等將兵擊之庚申景仁等自河陽渡

河會羅周翰兵合四萬軍于邢洺 丁丑王景仁等進

軍柏鄉 趙王鎔復告急於晉晉王以蕃漢副總管李

存審守晉陽自將兵自贊皇東下王處直遣將將兵五

千以從辛巳晉王至趙州與周德威合獲梁芻蕘者二

百人問之曰初發洛陽梁主有何號令對曰梁主戒上

將云鎮州反覆終爲子孫之患今悉以精兵付汝鎮州



雖以鐵爲城必爲我取之晉王命送於趙壬午晉王進  
軍距柏鄉三十里遣周德威等以胡騎迫梁營挑戰梁  
兵不出癸未復進距柏鄉五里營於野河之北又遣胡  
騎迫梁營馳射且詬之梁將韓勛等將步騎三萬分三  
道追之鎧冑皆被繒綺鏤金銀光彩炫曜晉人望之奪  
氣周德威謂李存璋曰梁人志不在戰徒欲曜兵耳不  
挫其銳則吾軍不振乃徇于軍曰彼皆汴州天武軍屠  
酤傭販之徒耳衣鎧雖鮮十不能當汝一擒獲一夫足

以自富此乃奇貨不可失也德威自帥精騎千餘擊其  
兩端左馳右突出入數四俘獲百餘人且戰且却距野  
河而止梁兵亦退德威言於晉王曰賊勢甚盛宜按兵  
以待其衰王曰吾孤軍遠來救人之急三鎮烏合利於  
速戰公乃欲按兵持重何也德威曰鎮定之兵長於守  
城短於野戰且吾所恃者騎兵利於平原廣野可以馳  
突今壓賊壘門騎無所展其足且衆寡不敵使彼知吾  
虛實則事危矣王不悅退臥帳中諸將莫敢言德威往

見張承業曰大王驟勝而輕敵不量力而務速戰今去賊咫尺所限者一水耳彼若造橋以薄我我衆立盡矣不若退軍高邑誘賊離營彼出則歸彼歸則出別以輕騎掠其饋餉不過踰月破之必矣承業入寨帳撫王曰此豈王安寢時邪周德威老將知兵其言不可忽也王蹶然而興曰予方思之時梁兵閉壘不出有降者詰之曰景仁方多造浮橋王謂德威曰果如公言是日焚營退保高邑

乾化元年柏鄉北不儲芻梁兵刈芻自給晉人以遊軍抄之梁兵不出周德威使胡騎環營馳射而詬之梁兵疑有伏愈不敢出剉屋茅坐席以飼馬馬多死春正月丁亥周德威與別將史建瑋李嗣源將精騎三千壓梁壘門而詬之王景仁韓勍怒悉衆而出德威等轉戰而北至高邑南李存璋以步兵陳於野河之上梁兵橫亘數里競前奪橋鎮定步兵禦之勢不能支晉王謂匡衛都指揮使李建及曰賊過橋則不可復制矣建及選卒

二百援槍大譟力戰却之建及許州人姓王李罕之之  
假子也晉王登高丘以望曰梁兵爭進而囂我兵整而  
靜我必勝戰自己至午勝負未決晉王謂周德威曰兩  
軍已合勢不可離我之興亡在此一舉我爲公先登公  
可繼之德威叩馬而諫曰觀梁兵之勢可以勞逸制之  
未易以力勝也彼去營三十餘里雖挾糗糧亦不暇食  
日昃之後饑渴內迫矢刃外交士卒勞倦必有退志當  
是時我以精騎乘之必大捷於今未可也王乃止時魏

滑之兵陳於東宋汴之兵陳於西至晡梁軍未食士無  
鬪志景仁等引兵稍却周德威疾呼曰梁兵走矣晉兵  
大譟爭進魏滑兵先退李嗣源帥衆譟於西陳之前曰  
東陳已走爾何久留梁兵互相驚怖遂大潰李存璋引  
步兵乘之呼曰梁人亦吾人也父兄子弟餉軍者勿殺  
於是戰士悉解甲投兵而棄之囂聲動天地趙人以深  
冀之憾不顧剽掠但奮白刃追之梁之龍驤神捷精兵  
殆盡自野河至柏鄉僵尸蔽地王景仁韓勅李思安以

數十騎走晉兵夜至柏鄉梁軍已去棄糧食資財器械不可勝計凡斬首二萬級李嗣源等追奔至邢州河朔大震保義節度使王檀嚴備然後開城納敗卒給以資糧散遣歸本道晉王收兵屯趙州杜廷隱等聞梁兵敗棄深冀而去悉驅二州丁壯爲奴婢老弱者坑之城中存者壞垣而已癸巳復以楊師厚爲北面都招討使將兵屯河陽收集散兵旬餘得萬人已亥晉王遣周德威史建瑋將三千騎趣澶魏張承業李存璋以部兵攻邢

州自以大軍繼之移檄河北州縣諭以利害帝遣別將徐仁溥將兵千人自西山夜入邢州助王檀城守己酉罷王景仁招討使落平章事 二月己未晉王至魏

州攻之不克上以羅周翰年少且忌其舊將佐庚申以戶部尚書李振爲天雄節度副使命杜廷隱將兵千人衛之自楊劉濟河間道夜入魏州助周翰城守癸亥晉王觀河於黎陽梁兵萬餘將渡河聞晉王至皆棄舟而去 乙丑周德威自臨清攻貝州拔夏津高唐攻博州



拔東武朝城攻澶州刺史張可臻棄城走帝斬之德威  
進攻黎陽拔臨河淇門逼衛州掠新鄉共城庚午帝帥  
親軍屯白司馬阪以備之楊師厚自磁相引兵救邢  
魏壬申晉解圍去師厚追之逾漳水而還邢州圍亦解  
師厚留屯魏州趙王鎔自來謁晉王於趙州大犒將士  
自是遣其養子德明將三十七都常從晉王征討德明  
本姓張名文禮燕人也壬午晉王發趙州歸晉陽留周  
德威等將三千人戍趙州夏六月帝命楊師厚將

兵三萬屯邢州

秋七月趙王鎔以楊師厚在邢州

甚懼會晉王于承天軍晉王謂鎔父友也事之甚恭鎔以梁寇爲憂晉王曰朱溫之惡極矣天將誅之雖有師厚輩不能救也脫有侵軼僕自帥衆當之叔父勿以爲憂鎔捧卮爲壽謂晉王爲四十六舅鎔幼子昭誨從行晉王斷衿爲盟許妻以女由是晉趙之交遂固

九

月帝聞晉趙謀入寇自將拒之戊戌以張宗奭爲西都留守庚子帝發洛陽甲辰至衛州方食軍前奏晉軍已

出井陘帝遽命輦北趣邢洺晝夜倍道兼行丙午至相  
州聞晉兵不出乃止 冬十月甲寅夜帝發相州乙

卯至洹水是夜邊吏言晉趙兵南下帝卽時進軍丙辰  
至魏縣或告云沙陀至矣士卒恐懼多逃亡嚴刑不能  
禁旣而復告云無寇上下始定戊午貝州奏晉兵寇東  
武尋引去帝以夾寨柏鄉屢失利故力疾北巡思一雪  
其耻意鬱鬱多躁忿功臣宿將往往以小過被誅衆心  
益懼旣而晉趙兵竟不出十一月壬午帝南還

二年春二月甲子帝發洛陽從官以帝誅戮無常多憚行帝聞之益怒是日至白馬頓賜從官食多未至遣騎趣之於路左散騎常侍孫騭右諫議大夫張衍兵部郎中張雋最後至帝命撲殺之衍宗奭之侄也丙寅帝至武陟段明遠供饋有加於前丁卯至獲嘉帝追思李思安去歲供饋有闕貶柳州司戶告辭稱明遠之能曰觀明遠之忠勤如此見思安之悖慢何如尋長流思安於崖州賜死明遠後更名凝乙亥帝至魏州命都招討使

宣義節度使楊師厚副使前河陽節度使李周彝圍棗  
彊招討應接使平盧節度使賀德倫副使天平留後袁  
象先圍蓆縣德倫河西胡人象先下邑人也戊寅帝至  
貝州 帝晝夜兼行三月辛巳至下博南登觀津冢趙  
將符習引數百騎出巡邏不知是帝遽前逼之或告曰  
晉兵大至矣帝棄行幄亟引兵趣棗彊與楊師厚軍合  
習趙州人也棗彊城小而堅趙人聚精兵數千守之師  
厚急攻之數日不下城壞復修死傷者以萬數城中矢

石將竭謀出降有一卒奮曰賊自柏鄉喪敗以來視我  
鎮人裂皆今往歸之如自投虎狼之口耳困窮如此  
何用身爲我請獨往試之夜縋城出詣梁軍詐降李周  
曇召問城中之備對曰非半月未易下也因謀曰某旣  
歸命願得一劒効死先登取守城將首周曇不許使荷  
擔從軍卒得間舉擔擊周曇首踣地左右救至得免帝  
聞之愈怒命師厚晝夜急攻丙戌拔之無問老幼盡殺  
之流血盈城初帝引兵渡河聲言五十萬晉忻州刺史

李存審屯趙州患兵少裨將趙行實請入土門避之存  
審不可及賀德倫攻蓆縣存審謂史建瑋李嗣肱曰吾  
王方有事幽薊無兵此來南方之事委吾輩數人今蓆  
縣方急吾輩安得坐而視之使賊得蓆縣必西侵深冀  
患益深矣當與公等以奇計破之存審乃引兵扼下博  
橋使建瑋嗣肱分道擒生建瑋分其麾下爲五隊隊各  
百人一之衡水一之南宮一之信都一之阜城自將一  
隊深入與嗣肱遇梁軍之樵芻者皆執之獲數百人明

日會於下博橋皆殺之留數人斷臂縱去曰爲我語朱公晉王大軍至矣時脩縣未下帝引楊師厚兵五萬就賀德倫共攻之丁亥始至縣西未及置營建瑯嗣肱各將三百騎效梁軍旗幟服色與樵芻者雜行日且暮至德倫營門殺門者縱火大譟弓矢亂發左右馳突旣暝各斬馘執俘而去營中大擾不知所爲斷臂者復來曰晉軍大至矣帝大駭燒營夜遁迷失道委曲行百五十里戊子旦乃至冀州脩之耕者皆荷鉏奮挺逐之委棄



軍資器械不可勝計既而復遣騎覘之曰晉軍實未來  
此乃史先鋒遊騎耳帝不勝慙憤由是病增劇不能乘  
肩輿留貝州旬餘諸軍始集 乙巳帝發貝州丁未至  
魏州 夏四月乙卯博王友文來朝請帝還東都丁  
巳發魏州己未至黎陽以疾淹留乙丑至滑州 己巳  
帝至大梁 戊寅帝發大梁 五月甲申帝至洛陽  
疾甚 閏月壬戌帝疾增甚謂近臣曰我經營天下三  
十年不意太原餘孽更昌熾如此吾觀其志不小天復

奪我年我死諸兒非彼敵也吾無葬地矣因哽咽絕而

復蘇

六月戊寅郢王友珪弑帝

冬十一月趙

將王德明將兵三萬掠武城至于臨清攻宗城下之癸

丑楊師厚伏兵唐店邀擊大破之斬首五千餘級

均王乾化三年春二月均王卽位于大梁 三月庚

戌加楊師厚兼中書令賜爵鄴王賜詔不名事無巨細

必咨而後行

夏五月楊師厚與博州刺史劉守奇

將汴滑徐兗魏博邢洺之兵十萬大掠趙境師厚自柏

鄉入攻土門趣趙州守奇自貝州入趣冀州所過焚掠  
庚戌師厚至鎮州營於南門外燔其開城壬子師厚自  
九門退軍下博守奇引兵與師厚會攻下博拔之晉將  
李存審史建瑋戍趙州兵少趙王告急於周德威德威  
遣騎將李紹衡會趙將王德明同拒梁軍師厚守奇自  
弓高渡御河而東逼滄州張萬進懼請遷于河南師厚  
表徙萬進鎮青州以守奇爲順化節度使

四年 晉王旣克幽州乃謀入寇

克幽州事見  
晉王滅燕

秋

七月會趙王鎔及周德威於趙州南寇邢州李嗣昭引  
昭義兵會之楊師厚引兵救邢州軍於漳水之東晉軍  
至張公橋裨將曹進金來奔晉軍退諸鎮兵皆引歸八  
月晉王還晉陽

貞明元年春三月天雄節度使兼中書令鄴王楊師厚  
卒師厚晚年矜功恃衆擅割財賦選軍中驍勇置銀槍  
勁節都數千人給賜優厚欲以復故時牙兵之盛帝雖  
外加尊禮內實忌之及卒私於宮中受賀租庸使趙巖

判官邵贊言於帝曰魏博爲唐腹心之蠹二百餘年不能除去者以其地廣兵彊之故也羅紹威楊師厚據之朝廷皆不能制陛下不乘此時爲之計所謂彈疽不嚴必將復聚安知來者不爲師乎宜分六州爲兩鎮以弱其權帝以爲然以平盧節度使賀德倫爲天雄節度使置昭德軍於相州割澶衛二州隸焉以宣徽使張筠爲昭德節度使仍分魏州將士府庫之半於相州筠海州人也二人旣赴鎮朝廷恐魏人不服遣開封尹劉鄩

將兵六萬自白馬濟河以討鎮定爲名實張形勢以脅之魏兵皆父子相承數百年族姻磐結不願分徙德倫屢趣之應行者皆嗟怨連營聚哭已丑劉鄩屯南樂先遣澶州刺史王彥章將龍驤五百騎入魏州屯金波亭魏兵相與謀曰朝廷忌吾軍府彊盛欲設策使之殘破耳吾六州歷代藩鎮兵未嘗遠出河門一旦骨肉流離生不如死是夕軍亂縱火大掠圍金波亭王彥章斬關而走詰旦亂兵入牙城殺賀德倫之親兵五百人劫德

倫置樓上有効節軍校張彥者自帥其黨拔白刃止剽掠夏四月帝遣供奉官扈異撫諭魏軍許張彥以刺史彥請復相澶衛三州如舊制異還言張彥易與但遣劉鄩加兵立當傳首帝由是不許但以優詔答之使者再返彥裂詔書抵於地戟手南向詬朝廷謂德倫曰天子愚暗聽人穿鼻今我兵甲雖彊苟無外援不能獨立宜投款於晉遂逼德倫以書求援於晉晉王得賀德倫書命馬步副總管李存審自趙州引兵進據臨清五月

存審至臨清劉鄩屯洹水賀德倫復遣使告急於晉晉王引大軍自黃澤嶺東下與存審會於臨清猶疑魏人之詐按兵不進德倫遣判官司空頊犒軍密言於晉王曰除亂當除根因言張彥凶狡之狀勸晉王先除之則無虞矣王默然頊貝州人也晉王進屯永濟張彥選銀槍効節五百人皆執兵自衛詣永濟謁見王登驛樓語之曰汝陵脅主帥殘虐百姓數日中迎馬訴寃者百餘輩我今舉兵而來以安百姓非貪人土地汝雖有功於



我不得不誅以謝魏人遂斬彥及其黨七人餘衆股栗  
王召諭之曰罪止八人餘無所問自今當竭力爲吾爪  
牙衆皆拜伏呼萬歲明日王緩帶輕裘而進令張彥之  
卒擐甲執兵翼馬而從仍以爲帳前銀槍都衆心由是  
大服劉鄩聞晉軍至選兵萬餘人自洹水趣魏縣晉王  
留李存審屯臨清遣史建瑋屯魏縣以拒之王自引親  
軍至魏縣與鄩夾河爲營帝聞魏博叛大悔懼遣天平  
節度使牛存節將兵屯楊劉爲鄩聲援會存節病卒以

匡國節度使王檀代之

六月庚寅朔賀德倫帥將

吏請晉王入府城慰勞既入德倫上印節請王兼領天  
雄軍王固辭曰此間汴寇侵逼貴道故親董師徒遠來  
相救又聞城中新罹塗炭故暫入存撫明公不垂恩信  
乃以印節見推誠非素懷德倫再拜曰今寇敵密邇軍  
城新有大變人心未安德倫腹心紀綱爲張彥所殺殆  
盡形孤勢弱安能統衆一旦生事恐負大恩王乃受之  
德倫帥將吏拜賀王承制以德倫爲大同節度使遣之

官德倫至晉陽張承業留之時銀槍効節都在魏城猶  
驕橫晉王下令自今有朋黨流言及暴掠百姓者殺無  
赦以沁州刺史李存進爲天雄都巡按使有訛言搖衆  
及彊取人一錢已上者存進皆梟首磔尸於市旬日城  
中肅然無敢喧譁者張彥之以魏博歸晉也貝州刺史  
張源德不從北結滄德南連劉鄩以拒晉數斷鎮定糧  
道或說晉王請先發兵萬人取源德然後東兼滄景則  
海隅之地皆爲我有晉王曰不然貝州城堅兵多未易

猝攻德州隸於滄州而無備若得而戍之則滄貝不得  
往來二壘旣孤然後可取乃遣騎兵五百晝夜兼行襲  
德州刺史不意晉兵至踰城走遂克之以遼州守捉將  
馬通爲刺史秋七月晉人夜襲澶州陷之刺史王彥章  
在劉鄩營晉人獲其妻子待之甚厚遣間使誘彥章  
章斬其使者晉人盡滅其家晉王以魏州李巖爲澶州  
刺史晉王勞軍於魏縣因帥百餘騎循河而上覘劉鄩  
營會天陰晦鄩伏兵五千於河曲叢林間鼓譟而出圍

王數重王躍馬大呼帥騎馳突所向披靡裨將夏魯奇等操短兵力戰自午至申乃得出亡其七騎魯奇手殺百餘人傷痕遍體會李存審救兵至乃得免王顧謂從騎曰幾爲虜嗤皆曰適足使敵人見大王之英武耳魯奇青州人也王以是益愛之賜姓名曰李紹奇劉鄩以晉兵盡在魏州晉陽必虛欲以奇計襲取之乃潛引兵自黃澤西去晉人怪鄩軍數日不出寂無聲迹遣騎覘之城中無烟火但時見旗幟循堞往來晉王曰吾聞劉

鄆用兵一步百計此必詐也更使覘之乃縛芻爲人執  
旗乘驢在城上耳得城中老弱者詰之云軍去已二日  
矣晉王曰劉鄆長於襲人短於決戰計彼行纔及山下  
亟發騎兵追之會陰雨積旬黃澤道險堇泥深尺餘士  
卒援藤葛而進皆腹疾足腫或墜崖谷死者什二三晉  
將李嗣恩倍道先入晉陽城中知之勒兵爲備鄆至樂  
平糗糧且盡又聞晉有備追兵在後衆懼將潰鄆諭之  
曰今去家千里深入敵境腹背有兵山谷高深如墜井

中去將何之惟力戰庶幾可免不則以死報君親耳衆  
泣而止周德威聞鄆西上自幽州引千騎救晉陽至土  
門鄆已整衆下山自邢州陳宋口踰漳水而東屯於宗  
城鄆軍往還馬死殆半時晉軍乏食鄆知臨清有蓄積  
欲據之以絕晉糧道德威急追鄆再宿至南宮遣騎擒  
其斥候者數十人斷腕而縱之使言曰周侍中已據臨  
清矣鄆軍大駭詰朝德威略鄆營而過入臨清鄆引軍  
趨貝州時晉王出師屯博州劉鄆軍堂邑周德威攻之

不克翌日鄆軍于莘縣晉軍踵之鄆治莘城塹而守之  
自莘及河築甬道以通饋餉晉王營於莘西三十里煙  
火相望一日數戰絳州刺史尹皓攻晉之隰州八月  
又攻慈州皆不克王檀與昭義留後賀瓌攻澶州拔之  
執李巖送東都帝以楊師厚故將楊延直爲澶州刺史  
使將兵萬人助劉鄆且招誘魏人晉王遣李存審將  
兵五千擊貝州張源德有卒三千每夕分出剽掠州民  
苦之請塹其城以安耕耘存審乃發八縣丁夫塹而圍



之劉鄩在莘久饋運不給晉人數抵其寨下挑戰鄩不出晉人乃攻絕其甬道以千餘斧斬寨木梁人驚擾而出因俘獲而還帝以詔書讓鄩老師費糧失亡多不速戰鄩奏稱臣比欲以奇兵擣其腹心還取鎮定期以旬時再清河朔無何天未厭亂淫雨積旬糧竭士病又欲據臨清斷其饋餉而周陽五奄至馳突如神臣今退保莘縣享士訓兵以俟進取觀其兵數甚多便習騎射誠爲勍敵未易輕也苟有隙可乘臣豈敢偷安養寇帝復

問鄴決勝之策鄴曰臣今無策惟願人給十斛糧賊可破矣帝怒責鄴曰將軍蓄米欲破賊邪欲療饑邪乃遣中使往督戰鄴集諸將問曰主上深居禁中不知軍旅徒與少年新進輩謀之夫兵在臨機制變不可預度今敵尚彊與戰必不利奈何諸將皆曰勝負須一決曠日何待鄴默然不悅退謂所親曰主暗臣諛將驕卒惰吾未知死所矣他日復集諸將於軍門人置河水一器於前令飲之衆莫之測鄴諭之曰一器猶難滔滔之河可

勝盡乎衆失色後數日鄆將萬餘人薄鎮定營鎮定人驚擾晉李存審以騎兵二千橫擊之李建及以銀槍千人助之鄆大敗奔還晉人逐之及寨下俘斬千計

冬十月劉鄆遣卒詐降於晉謀賂膳夫以毒晉王事泄晉王殺之并其黨五人

二年春二月帝屢趣劉鄆戰鄆閉壁不出晉王乃留副總管李存審守營自勞軍於貝州聲言歸晉陽鄆聞之奏請襲魏州帝報曰今掃境內以屬將軍社稷存亡繫

茲一舉將軍勉之鄴令澶州刺史楊延直引兵萬人會於魏州延直夜半至城南城中選壯士五百潛出擊之延直不爲備潰亂而走詰旦鄴自莘縣悉衆至城東與延直餘衆合李存審引營中兵踵其後李嗣源以城中兵出戰晉王亦自貝州至與嗣源當其前鄴見之驚曰晉王邪引兵稍却晉王躡之至故元城西與李存審遇晉王爲方陳於西北存審爲方陳於東南鄴爲圓陳於其中間四面受敵合戰良久梁兵大敗鄴引數十騎突

圍走梁步卒凡七萬晉兵環而擊之敗卒登木木枝爲之折追至河上殺溺殆盡鄴收散卒自黎陽渡河保滑州匡國節度使王檀密疏請發關西兵襲晉陽帝從之發河中陝同華諸鎮兵合二萬出陰地關奄至晉陽城下晝夜急攻城中無備發諸司丁匠及驅市人乘城拒守城幾陷者數四張承業大懼代北故將安金全退居太原往見承業曰晉陽根本之地若失之則大事去矣僕雖老病憂兼家國請以庫甲見授爲公擊之承業卽

與之金全帥其子弟及退將之家得數百人夜出北門擊梁兵於羊馬城內梁兵大驚引却昭義節度使李嗣昭聞晉陽有寇遣牙將石君立將五百騎救之君立朝發上黨夕至晉陽梁兵扼汾橋君立擊破之徑至城下大呼曰昭義侍中大軍至矣遂入城夜與安金全等分出諸門擊梁兵梁兵死傷什二三詰朝王檀引兵大掠而還晉王性矜伐以策非已出故金全等賞皆不行梁兵之在晉陽城下也大同節度使賀德倫部兵多逃入

梁軍張承業恐其爲變收德倫斬之帝聞劉鄩敗又聞王檀無功歎曰吾事去矣三月乙卯朔晉王攻衛

州壬戌刺史米昭降之又攻惠州刺史靳紹走擒斬之復以惠州爲磁州晉王還魏州上屢召劉鄩不至已巳卽以鄩爲宣義節度使使將兵屯黎陽夏四月

晉人拔洺州以魏州都巡檢使袁建豐爲洺州刺史劉鄩旣敗河南大恐鄩復不應召由是將卒皆搖心

六月晉人攻邢州保義節度使閻寶拒守帝遣捉生都

指揮使張溫將兵五百救之溫以其衆降晉 秋七

月甲寅朔晉王至魏州 八月晉王自將攻邢州昭

德節度使張筠棄相州走晉人復以相州隸天雄軍以

李嗣源爲刺史晉王遣人告閻寶以相州已拔又遣張

溫帥援兵至城下諭之寶舉城降晉王以寶爲東南面

招討使領天平節度使同平章事以李存審爲安國節

度使鎮邢州 九月晉王還晉陽 晉人以兵逼滄

州順化節度使戴思遠棄城奔東都滄州將毛璋據城



降晉晉王命李嗣源將兵鎮撫之嗣源遣璋詣晉陽晉王從李存審爲橫海節度使鎮滄州以嗣源爲安國節度使嗣源以安重誨爲中門使委以心腹重誨亦爲嗣源盡力重誨應州胡人也晉人圍貝州踰年張源德聞河北諸州皆爲晉有欲降謀於其衆衆以窮而後降恐不免死不從共殺源德嬰城固守城中食盡噉人爲糧乃謂晉將曰出降懼死請擐甲執兵而降事定而釋之晉將許之其衆三千人出降旣釋甲圍而殺之盡殪

晉王以毛璋爲貝州刺史於是河北皆入于晉惟黎陽  
爲梁守 晉王如魏州 冬十月晉王遣使如吳會  
兵以擊梁十一月吳以行軍副使徐知訓爲淮北行營  
都招討使及朱瑾等將兵趣宋毫與晉相應旣渡淮移  
檄州縣進圍潁州

三年春正月詔宣武節度使袁象先救潁州旣至吳引  
軍還 二月甲申晉王攻黎陽劉鄩拒之數日不克  
而去 劉鄩自滑州入朝朝議以河朔失守責之九月

落鄴平章事左遷亳州園練使

冬十月晉王還晉

陽王連歲出征凡軍府政事一委監軍使張承業承業  
勸課農桑蓄積金穀收市兵馬徵租行法不寬貴戚由  
是軍城肅清饋餉不乏

十一月晉王聞河冰合曰

用兵數歲限一水不得渡今冰自合天贊我也亟如魏  
州

十二月戊辰晉王畋于朝城是日大寒晉王視  
河水已堅引步騎稍度梁甲士三千戍楊劉城緣河數  
十里列柵相望晉王急攻皆陷之進攻楊劉城使步卒

斬其鹿角負葭葦塞塹四面進攻卽日拔之獲其守將  
安彥之先是租庸使戶部尚書趙巖言於帝曰陛下踐  
阼以來尚未南郊議者以爲無異藩侯爲四方所輕請  
幸西都行郊禮遂謁宣陵敬翔諫曰自劉鄩失利以來  
公私困竭人心惶恐今展禮圓丘必行賞賚是募虛名  
而受實弊也且勅敵近在河上乘輿豈宜輕動俟北方  
旣平報本未晚帝不聽已已如洛陽閱車服飾宮闕郊  
祀有日聞楊劉失守道路訛言晉軍已入大梁扼汜水

矣從官皆憂其家相顧涕泣帝惶駭失圖遂罷郊祀奔  
歸大梁

四年春正月帝至大梁晉兵侵掠至鄆濮而還敬翔上  
疏曰國家連年喪師疆土日蹙陛下居深宮之中所與  
計事者皆左右近習豈能量敵國之勝負乎先帝之時  
奄有河北親御豪傑之將猶不得志今敵至鄆州陛下  
不能留意臣聞李亞子繼位以來于今十年攻城野戰  
無不親當矢石近者攻楊劉身負束薪爲士卒先一鼓

拔之陛下儒雅守文宴安自若使賀瓌輩敵之而望攘  
逐寇讎非臣所知也陛下宜詢訪黎老別求異策不然  
憂未艾也臣雖驚怯受國重恩陛下必若乏才乞於邊  
陲自效疏奏趙張之徒言翔怨望帝遂不用 二月

河陽節度使北面行營排陳使謝彥章將兵數萬攻楊  
劉城甲子晉王自魏州輕騎詣河上彥章築壘自固決  
河水瀰浸數里以限晉兵晉兵不得進彥章許州人也  
安彥之散卒多聚於兗鄆山谷爲羣盜以觀二國成敗

晉王招募之多降於晉

夏六月壬戌晉王自魏州

勞軍於楊劉自泛舟測河水其深沒槍王謂諸將曰梁軍非有戰意但欲阻水以老我師當涉水攻之甲子王引親軍先涉諸軍隨之褰甲橫槍結陳而進是日水落深纔及膝匡國節度使北面行營排陳使謝彥章帥衆臨岸拒之晉兵不得進乃稍引却梁兵從之及中流鼓譟復進彥章不能支稍退登岸晉兵因而乘之梁兵大敗死傷不可勝紀河水爲之赤彥章僅以身免是日晉

人遂陷濱河四寨

秋七月晉王謀大舉入寇周德

威將幽州步騎三萬李存審將滄景步騎萬人李嗣源將邢洺步騎萬人王處直遣將將易定步騎萬人及麟勝雲蔚新武等州諸部落奚契丹室韋吐谷渾皆以兵會之八月并河東魏博之兵大閱於魏州 晉王自魏州如楊劉引兵略鄆濮而還循河而上軍於麻家渡賀瓌謝彥章將梁兵屯濮州北行臺村相持不戰晉王好自引輕騎迫敵營挑戰危窘者數四賴李紹榮力戰翼



衛之得免趙王鎔及王處直皆遣使致書曰元元之命  
繫於王本朝中興繫於王奈何自輕如此王笑謂使者  
曰定天下者非百戰何由得之安可但深居帷房以自  
肥乎一旦王將出營都營使李存審扣馬泣諫曰大王  
當爲天下自重彼先登陷陳將士之職也存審輩宜爲  
之非大王之事也王爲之攬轡而還它日伺存審不在  
策馬急出顧左右曰老子妨人戲王以數百騎抵梁營  
謝彥章伏精甲五千於隄下王引十餘騎度隄伏兵發

圍王數十重王力戰於中後騎繼至者攻之於外僅得出會李存審救至梁兵乃退王始以存審之言爲忠

晉王欲趣大梁而梁軍扼其前堅壁不戰百餘日十二月庚子朔晉王進兵距梁軍十里而舍初北面行營招討使賀瓌善將步兵排陳使謝彥章善將騎兵瓌惡其與已齊名一日瓌與彥章治兵於野瓌指一高地曰此可以立柵至是晉軍適置柵於其上瓌疑彥章與晉通謀瓌屢欲戰謂彥章曰主上悉以國兵授吾二人社稷

是賴今彊寇壓吾門而逗遛不戰可乎彥章曰彊寇憑陵利在速戰今深溝高壘據其津要彼安敢深入若輕與之戰萬一蹉跌則大事去矣瓌益疑之密譖之於帝與行營馬步都虞候曹州刺史朱珪謀因享士伏甲殺彥章及濮州刺史孟審澄別將侯溫裕以謀叛聞審澄溫裕亦騎將之良者也丁未以朱珪爲匡國留後癸丑又以爲平盧節度使兼行營馬步副指揮使以賞之晉王聞彥章死喜曰彼將帥自相魚肉亡無日矣賀瓌殘

虐失士卒心我若引軍直指其國都彼安得堅壁不動  
幸而一與之戰蔑不勝矣王欲自將萬騎直趣大梁周  
德威曰梁人雖屠上將其軍尚全輕行徼利未見其福  
不從戊午下令軍中老弱悉歸魏州起師趨汴庚申毀  
營而進衆號十萬 賀瓌聞晉王已西亦棄營而踵之  
晉王發魏博白丁三萬從軍以供營柵之役所至營柵  
立成壬戌至胡柳陂癸亥旦候者言梁兵自後至矣周  
德威曰賊倍道而來未有所舍我營柵已固守備有餘

既深入敵境動須萬全不可輕發此去大梁至近梁兵各念其家內懷憤激不以方略制之恐難得志王宜按兵勿戰德威請以騎兵援之使彼不得休息至暮營壘未立樵爨未具乘其疲乏可一舉滅也王曰前在河上恨不見賊今賊至不擊尚復何待公何怯也顧李存審曰敕輜重先發吾爲爾殿後破賊而去卽以親軍先出德威不得已引幽州兵從之謂其子曰吾無死所矣賀瓌結陳而至橫亘數十里王帥銀槍都陷其陳衝盪擊

斬往返十餘里行營左廂馬軍都指揮使鄭州防禦使  
王彥章軍先敗西走趨濮陽晉輜重在陳西望見梁旗  
幟驚潰入幽州陳幽州兵亦擾亂自相蹈藉周德威不  
能制父子皆戰死魏博節度副使王緘與輜重俱行亦  
死晉兵無復部伍梁兵四集勢甚盛晉王據高丘收散  
兵至日中軍復振陂中有土山賀瓌引兵據之晉王謂  
將士曰今日得此山者勝吾與汝曹奪之卽引騎兵先  
登李存珂與銀槍大將王建及以步卒繼之梁兵紛紛

而下遂奪其山日向晡賀瓌陳於山西晉兵望之有懼色諸將以爲諸軍未盡集不若斂兵還營詰朝復戰天平節度使東南面招討使閻寶曰王彥章騎兵已入濮陽山下惟步卒向晚皆有歸志我乘高趣下擊之破之必矣今王深入敵境偏師不利若復引退必爲所乘諸軍未集者聞梁再克必不戰自潰凡決勝料敵惟觀情勢情勢已得斷在不疑王之成敗在此一戰若不決力取勢縱收餘衆北歸河朔非王有也昭義節度使李嗣

昭曰賊無營壘日晚思歸但以精騎擾之使不得夕食俟其引退追擊可破也我若斂兵還營彼歸整衆復來勝負未可知也王建及擐甲橫槊而進曰賊大將已遁王之騎軍一無所失今擊此疲乏之衆如拉朽耳王但登山觀臣爲王破賊王愕然曰非公等言吾幾誤計嗣昭建及以騎兵大呼陷陳諸軍繼之梁兵大敗元城令吳瓊貴鄉令胡裝各帥白丁萬人於山下曳柴揚塵鼓譟以助其勢梁兵自相騰藉棄甲山積死亡者幾三萬



人裝証之曾孫也是日兩軍所喪士卒各三之二皆不能振晉王歸營聞周德威父子死哭之慟曰喪吾良將是吾罪也以其子幽州中軍兵馬使光輔爲嵐州刺史李嗣源與李從珂相失見晉軍撓敗不知王所之或曰王已北渡河矣嗣源遂乘冰北渡將之相州是日從珂從王奪山晚戰皆有功甲子晉王進攻濮陽拔之李嗣源知晉軍之捷復來見王於濮陽王不悅曰公以吾爲死邪渡河安之嗣源頓首謝罪以從珂有功但賜大鍾

酒以罰之然自是待嗣源稍薄 晉軍至德勝渡王  
彥章敗卒有走至大梁者曰晉人戰勝將至矣頃之晉  
兵有先至大梁問次舍者京城大恐帝驅市人登城又  
欲奔洛陽遇夜而止敗卒至者不滿千人傷夷逃散各  
歸鄉里月餘僅能成軍

五年春正月晉李存審於德勝南北夾河築兩城而守  
之晉王以存審代周德威爲內外蕃漢馬步總管晉王  
還魏州遣李嗣昭權知幽州軍府事 三月晉王自

領盧龍節度使以中門使李紹宏提舉軍府事代李嗣

昭紹宏宦者也本姓馬晉王賜姓名使與知嵐州事孟

知祥俱爲河東魏博中門使知祥又薦教練使鴈門郭

崇韜能治劇王以爲中門副使崇韜倜儻有智略臨事

敢決王寵待日隆先是中門使吳珪張虔厚相繼獲罪

及紹宏出幽州知祥懼禍稱疾辭位王乃以知祥爲河

東馬步都虞候自是崇韜專典機密 夏四月賀瓌

攻德勝南城百道俱進以竹竿聯艨艟十餘艘蒙以牛

草設睥睨戰格如城狀橫於河流以斷晉之救兵使不得渡晉王自引兵馳往救之陳於北岸不能進遣善游者馬破龍入南城見守將氏延賞延賞言矢石將盡陷在頃刻晉王積金帛於軍門募能破艨艟者衆莫知爲計親將李建及曰賀瓌悉衆而來冀此一舉若我軍不渡則彼爲得計今日之事建及請以死決之乃選効節敢死士得三百人被鎧操斧帥之乘舟而進將至艨艟流矢雨集建及使操斧者入艨艟間斧其竹竿又以木

開載薪沃油然火於上流縱之隨以巨艦實甲士鼓譟  
攻之艨艟旣斷隨流而下梁兵焚溺者殆半晉兵乃得  
渡瓌解圍走晉兵追之至濮州而還瓌退屯行臺村

秋七月晉王歸晉陽以巡官馮道爲掌書記中門使  
郭崇韜以諸將陪食者衆請省其數王怒曰孤爲效死  
者設食亦不得專可令軍中別擇河北帥孤自歸太原  
卽召馮道令草詞以示衆道執筆遂巡不爲曰大王方  
平河南定天下崇韜所請未至大過大王不從可矣何

必以此驚動遠近使敵國聞之謂大王君臣不和非所以隆威望也會崇韜入謝王乃止 八月乙未朔宣

義節度使賀瓚卒以開封尹王瓚爲北面行營招討使瓚將兵五萬自黎陽渡河掩擊澶魏至頓丘遇晉兵而旋瓚爲治嚴令行禁止據晉人上游十八里楊村夾河築壘運洛陽竹木造浮橋自滑州饋運相繼晉蕃漢馬步副總管振武節度使李存進亦造浮梁於德勝或曰浮梁須竹竿鐵牛石困我皆無之何以能成存進不聽

以葦筏維巨艦繫於土山巨木踰月而成人服其智

冬十月晉王如魏州發徒數萬廣德勝北城日與梁人爭大小百餘戰互有勝負左射軍使石敬瑭與梁人戰于河壩梁人擊敬瑭斷其馬甲橫衝兵馬使劉知遠以所乘馬授之自乘斷甲者徐行爲殿梁人疑有伏不敢迫俱得免敬瑭以是親愛之敬瑭知遠其先皆沙陀人敬瑭李嗣源之壻也十一月辛卯王瓚引兵至

戚城與李嗣源戰不利梁築壘貯糧於潘張距楊村

五十里十二月晉王自將騎兵自河南岸西上邀其餉者俘獲而還梁人伏兵於要路晉兵大敗晉王以數騎走梁數百騎圍之李紹榮識其旗單騎奮擊救之僅免戊戌晉王復與王瓚戰於河南瓚先勝獲晉將石君立等旣而大敗乘小舟渡河走保北城失亡萬計帝聞石君立勇敢將之繫於獄而厚餉之使人誘之君立曰我晉之敗將而爲用於梁雖竭誠効死誰則信之人各有君何忍反爲仇讎用哉帝猶惜之盡殺所獲晉將獨置



君立晉王乘勝遂拔濮陽帝召王瓚還以天平節度使戴思遠代爲北面招討使屯河上以拒晉人

六年夏四月河中節度使冀王友謙以兵襲取同州逐忠武節度使程全暉全暉奔大梁友謙以其子令德爲忠武留後表求節鉞帝怒不許旣而懼友謙怨望已酉以友謙兼忠武節度使制下友謙已求節鉞於晉王晉王以墨制除令德忠武節度使六月帝以泰寧節度使劉鄩爲河東道招討使帥感化節度使尹皓靜勝

節度使溫昭圖莊宅使段凝攻同州

閏月劉鄩等

圍同州朱友謙求救于晉秋七月晉王遣李存審李嗣昭李建及慈州刺史李存質將兵救之

九月李存

審等至河中卽日濟河梁人素輕河中兵每戰必窮追不置存審選精甲二百雜河中兵直壓劉鄩壘鄩出千騎逐之知晉人已至大驚自是不敢輕出晉人軍于朝邑河中事梁久將士皆持兩端諸軍大集芻粟踊貴友謙諸子說友謙且歸款於梁以退其師友謙曰昔晉王

親赴吾急秉燭夜戰今方與梁相拒又命將星行分我  
資糧豈可負邪晉人分兵攻華州壞其外城李存審等  
按兵累旬乃進逼劉鄩營鄩等悉衆出戰大敗收餘衆  
退保羅文寨又旬餘存審謂李嗣昭曰獸窮則搏不如  
開其走路然後擊之乃遣人牧馬於沙苑鄩等宵遁追  
擊至渭水又破之殺獲甚衆存審等移檄告諭關右引  
兵略地至下邳謁唐帝陵哭之而還河中兵進攻崇州

通鑑紀事本末卷四十中

謹案卷四十中第十頁前五行按巴堅舊作阿保  
機今改後仿此



總校官庶士臣張能照

校對官編修臣莫瞻菴

膳錄監生臣張槎

欽定四庫全書薈要

史部

通鑑紀事本末卷四十下

詳校官員外郎臣楊世綸





通鑑紀事本末卷四十下

宋 袁樞 撰

後唐滅梁二

龍德元年春正月蜀主吳王屢以書勸晉王稱帝晉王以書示僚佐曰昔王太師亦嘗遺先王書勸以唐室已

亡宜自帝一方先王語余云昔天子幸石門吾發兵誅賊臣當是之時威振天下吾若挾天子據關中自作九錫禪文誰能禁我顧吾家世忠孝立功帝室誓死不爲

耳汝它日當務以復唐社稷爲心慎勿效此曹所爲言  
猶在耳此議非所敢聞也因泣旣而將佐及藩鎮勸進  
不已乃令有司市玉造法物黃巢之破長安也魏州僧  
傳眞之師得傳國寶藏之四十年至是傳眞以爲常玉  
將鬻之或識之曰傳國寶也傳眞乃詣行臺獻之將佐  
皆奉觴稱賀張承業在晉陽聞之亟詣魏州諫曰吾王  
世世忠於唐室救其患難所以老奴三十餘年爲王拮  
拾財賦召補兵馬誓滅逆賊復本朝社耳今河北甫

定朱氏尚存而王遽卽大位殊非從來征伐之意天下其誰不解體乎王何不先滅朱氏復列聖之深讎然後求唐後而立之南取吳西取蜀汎掃宇內合爲一家當是之時雖使高祖太宗復生誰敢居王上者讓之愈久則得之愈堅矣老奴之志無它但以受先王大恩欲爲王立萬年之基耳王曰此非余所願奈羣下意何承業知不可止慟哭曰諸侯血戰本爲唐家今王自取之誤老奴矣卽歸晉陽邑邑成疾不復起

二月趙王鎔

養子張文禮使親軍殺鎔盡滅王氏之族獨置其子昭祚之妻普寧公主以自託于梁三月文禮遣使告亂于晉王且奉牋勸進固求節鉞晉王欲討之僚佐以爲吾方與梁爭不可更立敵於肘腋且從其請以安之王不得已夏四月承制授文禮成德留後初劉鄩與朱友謙爲昏鄩之受詔討友謙也至陝州先遣使移書諭以禍福待之月餘友謙不從然後進兵尹皓段凝素忌鄩因譖之於帝曰鄩逗遛養寇俟援兵帝信之鄩旣敗

歸以疾請解兵柄詔聽於西都就醫密令留守張宗奭  
酖之五月丁亥卒

秋七月晉王旣許藩鎮之請求

唐舊臣欲以備百官朱友謙遣前禮部尚書蘇循詣行  
臺循至魏州入牙城望府廨卽拜謂之拜殿見王呼萬  
歲舞蹈泣而稱臣翌日又獻大筆三十枝謂之畫日筆  
王大喜卽命循以本官爲河東節度副使張承業深惡  
之張文禮雖受晉命內不自安復遣間使因盧文進  
求援於契丹又遣間使告曰王氏爲亂兵所屠公主無

急今臣已北召契丹乞朝廷發精甲萬人相助自德棣  
渡河則晉人遁逃不暇矣帝疑未決敬翔曰陛下不乘  
此釁以復河北則晉人不可復破矣宜徇其請不可失  
也趙張輩皆曰今彊寇近在河上盡吾兵力以拒之猶  
懼不支何暇分萬人以救張文禮乎且文禮坐持兩端  
欲以自固於我何利焉帝乃止晉人屢於塞上及河津  
獲文禮蠟丸絹書晉王皆遣使歸之文禮慚懼文禮忌  
趙故將多所誅戮趙將符習將兵萬人從晉王在德勝

文禮請召歸以它將代之且以習子蒙爲都督府參軍  
遣人齎錢帛勞行營將士以悅之習見晉王泣涕請留  
晉王曰吾與趙王同盟討賊義猶骨肉不意一旦禍生  
肘腋吾誠痛之汝苟不忘舊君能爲之復讎乎吾以兵  
糧助汝習與部將三十餘人舉身投地慟哭曰故使授  
習等劔使之攘除寇敵自聞變故以來冤憤無訴欲引  
劔自剄顧無益於死者今大王念故使輔佐之勤許之  
復冤習等不敢煩霸府之兵願以所部徑前搏取凶豎

以報王氏累世之恩死不恨矣八月庚申晉王以習爲  
成德留後又命天平節度使閻寶相州刺史史建瑋將  
兵助之自邢洛而北文禮先病腹疽甲子晉兵拔趙州  
刺史王鋌降晉王復以爲刺史文禮聞之驚懼而卒其  
子處瑾祕不發喪與其黨韓正時謀悉力拒晉九月晉  
兵渡滹沱圍鎮州決漕渠以灌之獲其深州刺史張友  
順壬辰史建瑋中流矢卒晉王欲自分兵攻鎮州北面  
招討使戴思遠聞之謀悉楊村之衆襲德勝北城晉王



得梁降者知之冬十月己未晉王命李嗣源伏兵於戚城李存審屯德勝先以騎兵誘之僞示羸怯梁兵競進晉王嚴中軍以待之梁兵至晉王以鐵騎三千奮擊梁兵大敗思遠走趨楊村士卒爲晉兵所殺傷及自相蹈藉墜河陷水死亡二萬餘人晉王以李嗣源爲蕃漢內外馬步副總管同平章事十一月晉王使李存審

李嗣源守德勝自將兵攻鎮州張處瑾遣其弟處珙募僚齊儉謝罪請服晉王不許盡銳攻之旬日不克處瑾

使韓正時將千騎突圍出趨定州欲求救於王處直晉兵追至行唐斬之

二年 晉王之北攻鎮州也李存審謂李嗣源曰梁人聞我在南兵少不攻德勝必襲魏州吾二人聚於此何爲不若分軍備之遂分軍屯澶州戴思遠果悉楊村之衆趨魏州嗣源引兵先之軍於狄公祠下遣人告魏州使爲之備思遠至魏店嗣源遣其將石萬全將騎兵挑戰思遠知有備乃西渡洹水拔成安大掠而還又將兵五

萬攻德勝北城重塹複壘斷其出入晝夜急攻之李存

審悉力拒守晉王聞德勝勢危二月自幽州赴之五日

至魏州思遠聞之燒營遁還楊村晉天平節度使兼

侍中閻寶築壘以圍鎮州決呼沱水環之内外斷絕城

中食盡丙午遣五百餘人出求食寶縱其出欲伏兵取

之其人遂攻長圍寶輕之不爲備俄數千人繼至諸軍

未集鎮人遂壞長圍而出縱火攻寶營寶不能拒退保

趙州鎮人悉毀晉之營壘取其芻粟數日不盡晉王聞

之以昭義節度使兼中書令李嗣昭爲北面招討使以  
代寶 夏四月甲戌張處瑾遣兵千人迎糧於九門

李嗣昭設伏於故營邀擊之殺獲殆盡餘五人匿於牆  
墟間嗣昭環馬而射之鎮兵發矢中其腦嗣昭箛中矢  
盡拔矢於腦以射之一發而殪會日暮還營創流血不  
止是夕卒晉王聞之不御酒肉者累日嗣昭遺命悉以  
澤潞兵授節度判官任圜使督諸軍攻鎮州號令如一  
鎮人不知嗣昭之死圜三原人也晉王以天雄馬步都

指揮使振武節度使李存進爲北面招討使 閻寶勲  
憤疽發於背甲戌卒 五月乙酉晉李存進至鎮州

營于東垣渡夾呼沱水爲壘 晉衛州刺史李存儒本  
姓楊名婆兒以俳優得幸於晉王頗有膂力晉王賜姓  
名以爲刺史專事掊斂防城卒皆徵月課縱歸八月莊  
宅使段凝與步軍都指揮使張朗引兵夜渡河襲之詰  
旦登城執存儒遂克衛州戴思遠又與凝攻陷淇門共  
城新鄉於是澶州之西相州之南皆爲梁有晉人失軍

諸三之一梁軍復振帝以張朗爲衛州刺史朗徐州人也  
九月戊寅朔張處瑾使其弟處球乘李存進無

備將兵士千人奄至東垣渡時晉之騎兵亦向鎮州城  
下兩不相遇鎮兵及存進營門存進狼狽引十餘人闕  
于橋上鎮兵退晉騎兵斷其後夾擊之鎮兵殆盡存進  
亦戰沒晉王以蕃漢馬步總管李存審爲北面招討使  
鎮州食竭力盡處瑾遣使詣行臺請降未報存審兵至  
城下丙午夜城中將李再豐爲內應密投緹以納晉兵

比明畢登執處理兄弟家人及其黨高濛李肅齊儉送  
行臺趙人皆請而食之礫張文禮尸於市趙王故侍者  
得趙王遺骸於灰燼中晉王命祭而葬之以趙將符習  
爲成德節度使烏震爲趙州刺史趙仁貞爲深州刺史  
李再豐爲冀州刺史震信都人也符習不敢當成德辭  
曰故使無後而未葬習當斬衰以葬之俟禮畢聽命旣  
葬卽詣行臺趙人請晉王兼領成德節度使從之晉王  
割相衛二州置義寧軍以習爲節度使習辭曰魏博霸

府不可分也願得河南一鎮習自取之乃以爲天平節度使東南面招討使加李存審兼侍中

後唐莊宗同光元年春三月晉王築壇於魏州牙城之南夏四月己巳升壇祭告上帝遂卽皇帝位國號

大唐大赦改元以魏州爲興唐府建東京又於太原府建西京又以鎮州爲眞定府建北都時唐國所有凡十三節度五十州時契丹屢入寇抄掠饋運幽州食不支半年衛州爲梁所取潞州內叛人情岌岌以爲梁未



可取帝患之會鄆州將盧順密來奔先是梁天平節度使戴思遠屯楊村留順密與巡檢使劉遂嚴都指揮使燕顓守鄆州順密言於帝曰鄆州守兵不滿千人遂嚴顓皆失衆心可襲取也郭崇韜等皆以爲懸軍遠襲萬一不利虛棄數千人順密不可從帝密召李嗣源於帳中謀之曰梁人志在吞澤潞不備東方若得東平則潰其心腹東平果可取乎嗣源自胡柳有渡河之慙常欲立奇功以補過對曰今用兵歲久生民疲弊苟非出奇

取勝大功何由可成臣願獨當此役必有以報帝悅壬寅遣嗣源將所部精兵五千自德勝趨鄆州比及楊劉日已暮陰雨道黑將士皆不欲進高行周曰此天贊我也彼必無備夜渡河至城下鄆人不知李從珂先登殺守卒啟閤納外兵進攻牙城城中大擾癸卯旦嗣源兵盡入遂拔牙城劉遂嚴燕顓奔大梁嗣源禁焚掠撫吏民執知州事節度副使崔勗判官趙鳳送興唐帝大喜曰總管真奇才吾事集矣卽以嗣源爲天平節度使梁

主聞鄆州失守大懼斬劉遂嚴燕顓於市罷戴思遠招討使降授宣化留後遣使詰讓北面諸將段凝王彥章等趣令進戰敬翔知梁室已危以絕內執中入見梁主曰先帝取天下不以臣爲不肖所謀無不用今敵勢益彊而陛下棄忽臣言臣身無用不如死引繩將自經梁主止之問所欲言翔曰事急矣非用王彥章爲大將不可救也梁主從之以彥章代思遠爲北面招討使仍以段凝爲副帝聞之自將親軍屯澶州命蕃漢馬步都虞

候朱守殷守德勝戒之曰王鐵槍勇決乘憤激之氣必

來唐突宜謹備之梁主召問王彥章以破敵之期彥

章對曰三左右皆失笑彥章出兩日馳至滑州辛酉

置酒大會陰遣人具舟於楊村夜命甲士六百皆持巨

斧載冶者具韞炭乘流而下會飲尚未散彥章陽起更

衣引精兵數千循河南岸趨德勝天微雨朱守殷不爲

備舟中兵舉鑊燒斷之因以巨斧斬浮橋而彥章引兵

急擊南城浮橋斷南城遂破斬首數千級時受命適三

日矣守殷以小舟載甲士濟河救之不及彥章進攻潘  
張麻家口景店諸寨皆拔之聲勢大振帝遣宦者焦彥  
賓急趨楊劉與鎮使李周固守命守殷棄德勝北城撤  
屋材爲棧載兵械浮河東下助楊劉守備徙其芻糧薪  
炭於澶州所耗失殆半王彥章亦撤南城屋材浮河而  
下各行一岸每遇灣曲輒於中流交關飛矢雨集或全  
舟覆沒一日百戰互有勝負比及楊劉死亡士卒之半  
已已王彥章段凝以十萬之衆攻楊劉百道俱進晝夜

不息連巨艦九艘橫亘河津以絕援兵城垂陷者數四  
賴李周悉力拒之與士卒同甘苦彥章不能克退屯城  
南爲連營以守之楊劉告急於帝請日行百里以赴之  
帝引兵救之曰李周在內何憂日行六十里不廢畋獵  
六月乙亥至楊劉梁兵塹壘重複嚴不可入帝患之問  
計於郭崇韜對曰今彥章據守津要意謂可以坐取東  
平苟大軍不南則東平不守矣臣請築壘於博州東岸  
以固河津旣得以應接東平又可以分賊兵勢但慮彥

章詗知徑來薄我城不能就願陛下募敢死之士日令  
挑戰以綴之苟彥章旬日不東則城成矣時李嗣源守  
鄆州河北聲問不通人心漸離不保朝夕會梁右先鋒  
指揮使康延孝密請降於嗣源延孝者太原胡人有罪  
亡奔梁時隸段凝麾下嗣源遣押牙臨漳范延光送延  
孝蠟書詣帝延光因言於帝曰楊劉控扼已固梁人必  
不能取請築壘馬家口以通鄆州之路帝從之遣崇韜  
將萬人夜發倍道趨博州至馬家口渡河築城晝夜不

息帝在楊劉與梁人晝夜苦戰崇韜築新城凡六日王  
彥章聞之將兵數萬人馳至戊子急攻新城連巨艦十  
餘艘於中流以絕援路時版築僅畢城猶卑下沙土疏  
惡未有樓櫓及守備崇韜慰諭士卒以身先之四面拒  
戰遣使告急於帝帝自楊劉引大軍救之陳於新城西  
岸城中望之增氣大呼叱梁軍梁人斷紲斂艦帝艤舟  
將渡彥章解圍退保鄒家口鄆州奏報始通李嗣源密  
表請正朱守殷覆軍之罪帝不從

秋七月丁未帝



引兵循河而南彥章等棄鄒家口復趨楊劉甲寅遊奕  
將李紹興敗梁遊兵於清丘驛南段凝以爲唐兵已自  
上流渡驚駭失色面數彥章尤其深入戊午帝遣騎  
將李紹榮直抵梁營擒其斥候梁人益恐又以大棧焚  
其連艦王彥章等聞帝引兵已至鄒家口已未解楊劉  
圍走保楊村唐兵追逐之復屯德勝梁兵前後急攻諸  
城士卒遭矢石溺水暈死者且萬人委棄資糧鎧仗鍋  
幕動以千計楊劉比至圍解城中無食已三日矣彥

章疾趙張亂政及爲招討使謂所親曰待我成功還當盡誅姦臣以謝天下趙張聞之私相謂曰我輩寧死於沙陀不可爲彥章所殺相與協力傾之段凝素疾彥章之能而諂附趙張在軍中與彥章動相違戾百方沮撓之惟恐其有功潛伺彥章過失以聞於梁主每捷奏至趙張悉歸功於凝由是彥章功竟無成及歸楊村梁主信讒猶恐彥章旦夕成功難制徵還大梁使將兵會董璋攻澤州甲子帝至楊劉勞李周曰微卿善守吾事敗

矣 八月甲戌帝自楊劉還興唐 梁主命於滑州

決河東注曹濮及鄆以限唐兵 初梁主遣段凝監大  
軍於河上故翔李振屢請罷之梁主曰凝未有過振曰  
俟其有過則社稷危矣至是凝厚賂趙張求爲招討使  
翔振力爭以爲不可趙張主之竟代王彥章爲北面招  
討使於是宿將憤怒士卒亦不服天下兵馬副元帥張  
宗奭言於梁主曰臣爲副元帥雖衰朽猶足爲陛下捍  
禦北方段凝晚進功名未能服人衆議詢詢恐貽國家

深憂敬翔曰將帥繫國安危今國勢已爾陛下豈可尚  
不留意邪梁主皆不聽戊子凝將全軍五萬營于王林  
自高陵津濟河剽掠澶州諸縣至于頓丘梁主又命王  
彥章將保鑾騎士及它兵合萬人屯兗鄆之境謀復鄆  
州以張漢傑監其軍 庚寅帝引兵屯朝城戊戌康延  
孝帥百餘騎來奔帝解所御錦袍玉帶賜之以爲南面  
招討都指揮使領博州刺史帝屏人問延孝以梁事對  
曰梁朝地不爲狹兵不爲少然迹其行事終必敗亡何

則主既暗懦趙張兄弟擅權內結宮掖外納貨賂官之高下唯視賂之多少不擇才德不校勲勞段凝智勇俱無一旦居王彥章霍彥威之右自將兵以來專率斂行伍以奉權貴梁主每出一軍不能專任將帥常以近臣監之進止可否動爲所制近又聞欲數道出兵令董璋引陝虢澤潞之兵自石會關趣太原霍彥威以汝洛之兵自相衛邢洛寇鎮定王彥章張漢傑以禁軍攻鄆州段凝杜晏球以大軍當陛下決以十月大舉臣竊觀梁

兵聚則不少分則不多願陛下養勇蓄力以待其分兵  
帥精騎五千自鄆州直抵大梁擒其僞主旬月之間天  
下定矣帝大悅 九月帝在朝城梁段凝進至臨河

之南澶西相南日有寇掠自德勝失利以來喪芻糧數  
百萬租庸副使孔謙暴斂以供軍民多流亡租稅益少  
倉廩之積不支半歲澤潞未下盧文進王郁引契丹屢  
過瀛涿之南傳聞俟草枯冰合深入爲寇又聞梁人欲  
大舉數道入寇帝深以爲憂召諸將會議宣徽使李紹

宏等皆以爲鄆州城門之外皆爲寇境孤遠難守有之  
不如無之請以易衛州及黎陽於梁與之約和以河爲  
境休兵息民俟財力稍集更圖後舉帝不悅曰如此吾  
無葬地矣乃罷諸將獨召郭崇韜問之對曰陛下不櫛  
沐不解甲十五餘年其志欲以雪家國之讎恥也今已  
正尊號河北士庶日望升平始得鄆州尺寸之地不能  
守而棄之安能盡有中原乎臣恐將士解體將來食盡  
衆散雖畫河爲境誰爲陛下守之臣嘗細詢康延孝以

河南之事度已料彼日夜思之成敗之機決在今歲梁  
今悉以精兵授段凝據我南鄙又決河自固謂我猝不  
能渡恃此不復爲備使王彥章侵逼鄆州其意冀有姦  
人動搖變生於內耳段凝本非將材不能臨機決策無  
足可畏降者皆言大梁無兵陛下若留兵守魏固保楊  
劉自以精兵與鄆州合勢長驅入汴彼城中旣空虛必  
望風自潰苟僞主授首則諸將自降矣不然今秋穀不  
登軍糧將盡若非陛下決志大功何由可成諺曰當道



築室三年不成帝王應運必有天命在陛下勿疑耳帝

曰此正合朕志丈夫得則爲王失則爲虜吾行決矣司  
天奏今歲天道不利深入必無功帝不聽王彥章引兵  
踰汶水將攻鄆州李嗣源遣李從珂將騎兵逆戰敗其  
前鋒於遞坊鎮獲將士三百人斬首二百級彥章退保  
中都戊辰提奏至朝城帝大喜謂郭崇韜曰鄆州告捷  
足壯吾氣已已命將士悉遣其家歸興唐 冬十月  
帝遣魏國夫人劉氏皇子繼岌歸興唐與之訣曰事之

成敗在此一決若其不濟當聚吾家於魏宮而焚之仍  
命豆盧革李紹宏張憲王正言同守東京壬申帝以大  
軍自楊劉濟河癸酉至鄆州中夜進軍踰汶以李嗣源  
爲前鋒甲戌旦遇梁兵一戰敗之追至中都圍其城城  
無守備少頃梁兵潰圍出追擊破之王彥章以數十騎  
走龍武大將軍李紹奇單騎追之識其聲曰王鐵槍也  
拔稍刺之彥章重傷馬蹶遂擒之并擒都監張漢傑曹  
州刺史李知節裨將趙廷隱劉嗣彬等二百餘人斬首

數千級廷隱開封人嗣彬知俊之族子也彥章嘗謂人曰李亞子鬪雞小兒何足畏至是帝謂彥章曰爾嘗謂我小兒今日服未又問爾名善將何不守兗州中都無壁壘何以自固彥章對曰天命已去無足言者帝惜彥章之材欲用之賜藥傅其創屢遣人誘諭之彥章曰余本匹夫蒙梁恩位至上將與皇帝交戰十五年今兵敗力窮死自其分縱皇帝憐而生我我何面目見天下之人乎豈有朝爲梁將暮爲唐臣此我所不爲也帝復遣

李嗣源自往諭之彥章臥謂嗣源曰汝非邈佶烈乎彥章素輕嗣源故以小名呼之於是諸將稱賀帝舉酒屬李嗣源曰今日之功公與崇韜之力也邠從紹宏輩語大事去矣帝又謂諸將邠所患惟王彥章今已就擒是天意滅梁也段凝猶在河上進退之計宜何向而可諸將以爲傳者雖云大梁無備未知虛實今東方諸鎮兵皆在段凝麾下所餘空城耳以陛下天威臨之無不下者若先廣地東傳于海然後觀釁而動可以萬全康延

孝固請亟取大梁李嗣源曰兵貴神速今彥章就擒段  
凝必未之知就使有人走告之疑信之間尚須三日設  
若知吾所向卽發救兵直路則阻決河須自白馬南渡  
數萬之衆舟楫亦難猝辦此去大梁至近前無山險方  
陳橫行晝夜兼程信宿可至段凝未離河上友貞已爲  
吾擒矣延孝之言是也請陛下以大軍徐進臣願以千  
騎前驅帝從之令下諸軍皆踊躍願行是夕嗣源帥前  
軍倍道趣大梁乙亥帝發中都昇王彥章自隨遣中使

問彥章曰吾此行克乎對曰段凝有精兵六萬雖主將非材亦未肯遽爾倒戈殆難克也帝知其終不爲用遂斬之丁丑至曹州梁守將降王彥章敗卒有先至大梁告梁主以彥章就擒唐軍長驅且至者梁主聚族哭曰運祚盡矣召羣臣問策皆莫能對梁主謂敬翔曰朕居常忽卿所言以至於此今事急矣卿勿以爲懟將若之何翔泣曰臣受先帝厚恩殆將三紀名爲宰相其實朱氏老奴事陛下如郎君臣前後獻言莫匪盡忠陛下初

用段凝臣極言不可小人朋比致有今日今唐兵且至  
段凝限於水北不能赴救臣欲請陛下出居避狄陛下  
必不聽從欲請陛下出奇合戰陛下必不果決雖使良  
平更生誰能爲陛下計者臣願先賜死不忍見宗廟之  
亡也因與梁主相向慟哭梁主遣張漢倫馳騎追段凝  
軍漢倫至滑州墜馬傷足復限水不能進時城中尚有  
控鶴軍數千朱珪請帥之出戰梁主不從命開封尹王  
瓚驅市人乘城爲備初梁陝州節度使邵王友誨全昱

之子也性穎悟人心多向之或言其誘致禁軍欲爲亂  
梁主召還與其兄友諒友能竝幽于別第及唐師將至  
梁主疑諸兄弟乘危謀亂并皇弟賀王友雍建王友徽  
盡殺之梁主登建國樓面擇親信厚賜之使衣野服齋  
蠟詔促段凝軍旣辭皆亡匿或請幸洛陽收集諸軍以  
拒唐唐雖得都城勢不能久留或請幸段凝軍控鶴都  
指揮使皇甫麟曰凝本非將材官由幸進今危窘之際  
望其臨機制勝轉敗爲功難矣且凝聞彥章軍敗其膽



已破安知能終爲陛下盡節乎趙巖曰事勢如此一下此樓誰心可保梁主乃止復召宰相謀之鄭珏請自懷傳國寶詐降以紓國難梁主曰今日固不敢愛寶但如卿此策竟可了否珏俛首久之曰但恐未了左右皆縮頸而笑梁主日夜涕泣不知所爲置傳國寶於卧內忽失之已爲左右竊之迎唐軍矣戊寅或告唐軍已過曹州塵埃漲天趙巖謂從者曰吾待溫許州厚必不負我遂奔許州梁主謂皇甫麟曰李氏吾世讎理難降首不

可俟彼刀鋸吾不能自裁卿可斷吾首麟泣曰臣爲陛下揮劍死唐軍則可矣不敢奉此語梁主曰卿欲賣我邪麟欲自剄梁主持之曰與卿俱死麟遂弑梁主因自殺梁主爲人溫恭儉約無荒淫之失但寵信趙張使擅威福疎棄敬李舊臣不用其言以至於亡己卯旦李嗣源軍至大梁攻封丘門王瓚開門出降嗣源入城撫安軍民是日帝入自梁門百官迎謁於馬首拜伏請罪帝慰勞之使各復其位李嗣源迎賀帝喜不自勝手引嗣

源衣以頭觸之曰吾有天下卿父子之功也天下與爾共之帝命訪求梁主頃之或以其首獻李振謂敬翔曰有詔洗滌吾輩相與朝新君乎翔曰吾二人爲梁宰相君昏不能諫國亡不能救新君若問將何辭以對是夕未曙或報翔曰崇政李太保已入朝矣翔歎曰李振謬爲大夫朱氏與新君世爲仇讎今國亡君死縱新君不誅何面目入建國門乎乃縊而死庚辰梁百官復待罪於朝堂帝宣赦赦之趙巖至許州溫昭圖迎謁歸第斬

首來獻盡沒巖所齋之貨昭圖復名韜辛巳詔王贊收  
朱友貞尸殯於佛寺漆其首函之藏於大社段凝自滑  
州濟河入援以諸軍排陳使杜晏球爲前鋒至封丘遇  
李從珂晏球先降壬午凝將其衆五萬至封丘亦解甲  
請降凝帥諸大將先詣闕待罪帝勞賜之慰諭士卒使  
各復其所凝出入公卿間揚揚自得無愧色梁之舊臣  
見者皆欲翫其面抉其心丙戌詔貶梁中書侍郎同平  
章事鄭珏爲萊州司戶蕭頊爲登州司戶翰林學士劉

岳爲均州司馬任贊爲房州司馬姚顗爲復州司馬封  
翹爲唐州司馬李懌爲懷州司馬竇夢徵爲沂州司馬  
崇政學士劉光素爲密州司戶陸崇爲安州司戶御史  
中丞王權爲隨州司戶以其世受唐恩而仕梁貴顯故  
也岳崇龜之從子顗萬年人翹敖之孫懌京兆人權起  
之孫也段凝杜晏球上言曰梁要人趙巖趙鵠張希逸  
張漢倫張漢傑張漢俊朱珪等竊弄威福殘蠹羣生不  
可不誅詔敬翔李振首佐朱溫共傾唐祚契丹實喇鄂

博叛兄棄母負恩背國宜與巖等並族誅於市自餘文武將吏一切不問又詔追廢朱溫朱友貞爲庶人毀其宗廟神主帝之與梁戰於河上也梁拱宸左廂都指揮使陸思鐸善射嘗於竒上自鏤姓名射帝中馬鞍帝拔箭藏之至是思鐸從衆俱降帝出箭示之思鐸伏地待罪帝慰而釋之尋授龍武右廂都指揮使以豆盧革尚在魏命樞密使郭崇韜權行中書事梁諸藩鎮稍稍入朝或上表待罪帝皆慰釋之宋州節度使袁象先首來

入朝陝州留後霍彥威次之象先輦珍貨數十萬徧賂

劉夫人及權貴伶官宦者旬日中外爭舉之恩寵隆異

已丑詔僞庭節度觀察防禦團練使刺史及諸將校並

不議改更將校官吏先奔僞庭者一切不問庚寅豆盧

革至自魏甲午加崇韜守侍中領成德節度使崇韜權

兼內外謀猷規益竭忠無隱頗亦薦引人物豆盧革受

成而已無所裁正丙申賜滑州留後段凝姓名曰李

紹欽耀州刺史杜晏球曰李紹虔丁酉梁西都留守

河南尹張宗奭來朝復名全義獻幣馬千計帝命皇子繼岌皇弟存紀等兄事之帝欲發梁太祖墓斲棺焚其尸全義上言朱溫雖國之深讎然其人已死刑無可加屠滅其家足以爲報乞免焚斲以存聖恩帝從之但鏹其闕室削封樹而已戊戌加天下節度使李嗣源兼中書令以北京留守繼岌爲東京留守同平章事帝遣使宣諭諸道梁所除節度使五十餘人皆上表入貢郭崇韜上言河南節度使刺史上表者但稱姓名未



新除官恐負憂疑十一月始降制以新官命之 癸卯

河中節度使朱友謙入朝 張全義請帝遷都洛陽從

之 已已賜朱友謙姓名曰李繼麟命繼發兄事之以

康延孝爲鄭州防禦使賜姓名曰李紹琛 廢北都復

爲成德軍 賜宣武節度使袁象先姓名曰李紹安匡

國節度使溫韜入朝賜姓名曰李紹冲紹冲多齋金帛

賂劉夫人及權貴伶官旬日復遣還鎮郭崇韜曰國家

爲唐雪耻溫韜發唐山陵殆徧其罪與朱溫相埒耳何

得復居方鎮天下義士其謂我何上曰入汴之初已赦其罪竟遣之初梁均王將祀南郊於洛陽聞楊劉陷而止其儀物具在張全義請上亟幸洛陽謁廟畢卽祀南郊從之丙辰復以梁東京爲宣武軍詔文武官先詣洛陽甲子帝發大梁十二月庚午至洛陽二年春二月己巳朔上祀南郊大赦

莊宗滅蜀

後梁均王乾化三年蜀太子元膺猥喙齟齬目視不

正而警敏知書善騎射性狷急猜忍蜀主命杜光庭選  
純靜有德者使侍東宮光庭薦儒者許寂徐簡夫太子  
未嘗與之交言日與樂工群小嬉戲無度僚屬莫敢諫  
秋七月蜀主將以七夕出遊丙午太子召諸王大臣宴  
飲集王宗翰內樞密使潘峭翰林學士承旨高陽毛文  
錫不至太子怒曰集王不來必峭與文錫離間也大昌  
軍使徐瑤常謙素爲太子所親信酒行屢目少保唐道  
襲道襲懼而起丁未旦太子入白蜀主曰潘峭毛文錫

離間兄弟蜀主怒命貶逐峭文錫以前武泰節度使兼侍中潘炕爲內樞密使太子出道襲入蜀主以其事告之道襲曰太子謀作亂欲召諸將諸王以兵錮之然後舉事耳蜀主疑焉遂不出道襲請召屯營兵入宿衛許之内外戒嚴太子初不爲備聞道襲召兵乃以天武甲士自衛捕潘峭毛文錫至搃之幾死囚諸東宮又捕成都尹潘嶠囚諸得賢門戊申徐瑤常謙與懷勝軍使嚴璘等各帥所部兵奉太子攻道襲至清風樓道襲引屯

營兵出拒戰道襲中流矢逐至城西斬之殺屯營兵甚衆中外驚擾潘炕言於蜀主曰太子與唐道襲爭權耳無它志也陛下宜面諭大臣以安社稷蜀主乃召兼中書令王宗侃王宗賀前利州團練使王宗魯等使發兵討爲亂者徐瑤常謙等宗侃等陳於西毬場門兼侍中王宗黯自大安門梯城而入與瑤謙戰於會同殿前殺數千人餘衆皆潰瑤死謙與太子奔龍躍池匿於艦中及暮稍定己酉旦太子出就舟人勾食舟人以告蜀主

遣集王宗翰往慰撫之比至太子已爲衛士所殺蜀主  
疑宗翰殺之大慟不已左右恐事變會張格呈慰諭軍  
民榜讀至不行斧鉞之誅將誤社稷之計蜀主收涕曰  
朕何敢以私害公於是下詔廢太子元膺爲庶人宗翰  
奏誅手刃太子者元膺左右坐誅死者數十人貶竄者  
甚衆庚戌贈唐道襲太師謚忠壯復以潘峭爲樞密使  
冬十月蜀潘炕屢請立太子蜀主以雅王宗輅類  
已信王宗傑才敏欲擇一人立之鄭王宗衍最幼其母

徐賢妃有寵欲立其子使飛龍使唐文辰諷張格上表請立宗衍格夜以表示功臣王宗侃等詐云受密旨衆皆署名蜀主令相者視諸子亦希旨言鄭王相最貴蜀主以爲衆人實欲立宗衍不得已許之曰宗衍幼懦能堪其任乎甲午立宗衍爲太子

四年春正月蜀主命太子判六軍開崇勲府置僚屬後更謂之天策府 秋八月戊子以內樞密使潘峭爲

武泰軍節度使同平章事翰林學士承旨毛文錫爲禮

部尚書判樞密院

貞明三年秋七月蜀飛龍使唐文宸居中用事張格附之與司徒判樞密院事毛文錫爭權文錫將以女適左僕射兼中書侍郎同平章事庾傳素之子會親族於樞密院用樂不先表聞蜀主聞樂聲怪之文宸從而譖之八月庚寅貶文錫茂州司馬其子司封員外郎詢流維州籍沒其家貶文錫弟翰林學士文晏爲榮經尉傳素罷爲工部尚書以翰林學士承旨庾凝績權判內樞密



院事凝績傳素之再從弟也

四年 蜀太子衍好酒色樂遊戲蜀主嘗自夾城過聞太子與諸王鬪雞擊毬喧呼之聲歎曰吾百戰以立基業此輩其能守之乎由是惡張格而徐賢妃爲之內主竟不能去也信王宗傑有才略屢陳時政蜀主賢之有廢立意二月癸亥宗傑暴卒蜀主深疑之 蜀主自永平未得疾昏瞶至是增劇以北面行營招討使兼中書令王宗弼沉靜有謀五月召還以爲馬部都指揮使乙亥

召大臣入寢殿告之曰太子仁弱朕不能違諸公之請  
踰次而立之若其不堪大業可賓諸別宮幸勿殺之但  
王氏子弟諸公擇而輔之徐妃兄弟止可優其祿位慎  
勿使之掌兵預政以全其宗族內飛龍使唐文宸久典  
禁兵叅預機密欲去諸大臣遣人守宮門王宗弼輩三  
十餘人日至朝堂不得入見文宸屢以蜀主之命慰撫  
之伺蜀主殂卽作難遣其黨內皇城使潘在迎偵察外  
事在迎以其謀告宗弼等宗弼等排闥入言文宸之罪

以天冊府掌書記崔延昌權判六軍事召太子入侍疾  
丙子貶唐文晟爲眉州刺史翰林學士承旨王保晦坐  
附會文晟削官爵流瀘州在迎炕之子也丙申蜀主詔  
中外財賦中書除授諸司刑獄案牘專委庾凝績都城  
及行營軍旅之事委宣徽南院使宋光嗣丁酉削唐文  
晟官爵流雅州辛丑以宋光嗣爲內樞密使與兼中書  
令王宗弼宗瑤宗綰宗夔竝受遺詔輔政初蜀主雖因  
唐制置樞密使專用士人及唐文晟得罪蜀主以諸將

多許州故人恐其不爲幼主用故以光嗣代之自是宦者始用事六月壬寅朔蜀主殂癸卯太子卽皇帝位尊徐賢妃爲太后徐淑妃爲太妃以宗光嗣判六軍諸衛事乙卯殺唐文晟王保晦命西面招討副使王宗昱殺天雄節度使唐文裔於秦州免左保勝軍使領右街使唐道崇官蜀唐文晟旣死太傅門下侍郎同平章事張格內不自安或勸格稱疾俟命禮部尚書楊玢自恐失勢謂格曰公有援立大功不足憂也庚午貶格爲茂

州刺史玠爲榮經尉吏部侍郎許寂戶部侍郎潘嶠皆  
坐格黨貶官格尋再貶維州司戶

秋七月壬申朔

蜀主以兼中書令王宗弼爲鉅鹿王宗瑤爲臨淄王宗  
綰爲臨洮王宗播爲臨潁王宗喬宗夔及兼侍中宗黀  
皆爲琅邪郡王 甲戌以王宗侃爲樂安王丙子以兵  
部尚書庾傳素爲太子少保兼中書侍郎同平章事蜀  
主不親政事內外遷除皆出於王宗弼宗弼納賄多私  
上下咨怨宋光嗣通敏善希合蜀主寵任之蜀由是遂

袁 蜀諸王皆領軍使彭王宗鼎謂其昆弟曰親王典  
兵禍亂之本今王少臣彊讒間將興繕甲訓士非吾輩  
所宜爲也因固辭軍使蜀主許之但營書舍植松竹自  
娛而已 乙丑蜀主以內給事王廷紹歐陽晃李周輅  
朱光葆宋承蒞田魯儔等爲將軍及軍使皆干預政事  
驕縱貪暴大爲蜀患周庠切諫不聽晃患所居之隘夜  
因風縱火焚西鄰軍營數百間明旦召匠廣其居蜀主  
亦不之問光葆光嗣之從弟也

五年蜀主奢縱無度日與太后太妃遊宴於貴臣之家  
及遊近郡名山飲酒賦詩所費不可勝紀仗內教坊使  
嚴旭彊取士民女子內宮中或得厚賂而免之以是累  
遷至蓬州刺史太后太妃各出教令賣刺史令錄等官  
每一官闕數人爭納賂賂多者得之

六年秋七月乙卯蜀主下詔北巡以禮部尚書兼成都  
尹長安韓昭爲文思殿大學士位在翰林承旨上昭無  
文學以便佞得幸出入宮禁就蜀主乞通渠巴集數州

刺史賣之以營居第蜀主許之識者知蜀之將亡八月  
戊辰蜀主發成都被金甲冠珠帽執弓矢而行旌旗兵  
甲亘百餘里雒令段融上言不宜遠離都邑當委大臣  
征討不從九月次安遠城 冬十月辛酉蜀主如武

定軍數日復還安遠 十一月庚戌蜀主發安遠城

十二月庚申至利州閬州團練使林思謬來朝請幸所  
治從之癸亥泛江而下龍舟畫舸輝映江渚州縣供辦  
民始愁怨壬申至閬州州民何康女色美將嫁蜀主取



之賜其夫家帛百匹夫一慟而卒癸未至梓州

龍德元年春正月甲午蜀主還成都 初蜀主之爲太

子高祖爲聘兵部尚書高知言女爲妃無寵及韋妃入  
宮尤見疎薄至是遣還家知言驚仆不食而卒韋妃者  
徐耕之孫也有殊色蜀主適徐氏見而悅之太后因納  
於後宮蜀主不欲娶於母族託云韋昭度之孫初爲媼  
好累加元妃蜀主常列錦步障擊毬其中往往遠適而  
外人不知藝諸香晝夜不絕久而厭之更藝卓犖以亂

其氣結繒爲山及宮殿樓觀於其上或爲風雨所敗則更以新者易之或樂飲繒山涉旬不下山前穿渠通禁中或乘船夜歸令宮女秉蠟炬千餘居前船却立炤之水面如晝或酣飲禁中鼓吹沸騰以至達旦以是爲常二年春二月蜀主好爲微行酒肆倡家靡所不到惡人識之乃下令士民皆著大裁帽夏四月蜀軍使王承綱女將嫁蜀主取之入宮承綱請之蜀主怒流於茂州女聞父得罪自殺

後唐莊宗同光元年秋八月蜀主以文思殿大學士韓昭內皇城使潘在迎武勇軍使顧在玠爲狎客陪侍遊宴與宮女雜坐或爲豔歌相唱和或談嘲謔浪鄙俚褻慢無所不至蜀主樂之在玠彥朗之子也時樞密使宋光嗣等專斷國事恣爲威虐務徇蜀主之欲以盜其權宰相王鐸庾傳素等各保寵祿無敢規正潘在迎每勸蜀主誅諫者無使謗國嘉州司馬劉贊獻陳後主三閣圖并作歌以諷賢良方正蒲禹卿對策語極切直蜀主

雖不罪亦不能用也

九月庚戌蜀主以重陽宴近

臣於宣華苑酒酣嘉王宗壽乘間極言社稷將危流涕不已韓昭潘在迎曰嘉王好酒悲因諧笑而罷

冬

十月彗星見與鬼長丈餘蜀司天監言國有大災蜀主詔於玉局化設道場右補闕張雲上疏以爲百姓怨氣上徹於天故彗星見此乃國亡之徵非祈禳可弭蜀主怒流雲黎州卒於道

二年春三月己亥朔蜀主宴近臣於怡神亭酒酣君臣

及宮人皆脫冠露髻喧譁自恣知制誥京兆李龜頑諫  
曰君臣沈湎不憂國政臣恐啟北敵之謀不聽 夏

四月帝遣客省使李嚴使于蜀嚴盛稱帝威德有混一  
天下之志且言朱氏篡竊諸侯曾無勤王之舉王宗儔  
以其語侵蜀請斬之蜀主不從宣徽北院使宋光葆上  
言晉王有憑陵我國家之志宜選將練兵屯戍邊鄙積  
糗糧治戰艦以待之蜀主乃以光葆爲梓州觀察使充  
武德節度留後 五月戊申蜀主遣李嚴還初帝因

嚴入蜀令以馬市宮中珍玩而蜀法禁錦綺珍奇不得入中國其粗惡者乃聽入中國謂之入草物嚴還以聞帝怒曰王衍寧免爲入草之人乎嚴因言於帝曰衍童騃荒縱不親政務斥遠故老昵比小人其用事之臣王宗弼宋光嗣等諂諛專恣黷貨無厭賢愚易位刑賞紊亂君臣上下專以奢淫相尚以臣觀之大兵一臨瓦解土崩可翹足而待也帝深以爲然

秋八月戊辰蜀

主以右定遠軍使王宗鐸爲招討馬步使帥二十一軍

屯洋州乙亥以長直馬軍使林思謬爲昭武節度使戍利州以備唐 帝復遣使者李彥稠入蜀 九月己

亥至成都 蜀前山南節度使兼中書令王宗儔以蜀主失德與王宗弼謀廢立宗弼猶豫未決庚戌宗儔憂憤而卒宗弼謂樞密使宋光嗣景潤澄等曰宗儔教我殺爾曹今日無患矣光嗣輩俯伏泣謝宗弼子承班聞之謂人曰吾家難乎免矣 乙卯蜀主以前鎮江節度使張武爲峽路應援招討使 蜀宣徽北院使王承休

請擇諸軍驍勇者萬二千人置駕下左右龍武步騎四十軍兵械給賜皆優異於它軍以承休爲龍武軍馬步都指揮使以裨將安重霸副之舊將無不憤恥重霸雲州人以狡佞賄賂事承休故承休悅之 冬十一月蜀

主遣其翰林學士歐陽彬來聘彬衡山人也又遣李彥稠東還 蜀以唐修好罷威武城戍召關宏業等二十四軍還成都戊申又罷武定武興招討劉潛等三十七軍 辛酉蜀主罷天雄軍招討命王承騫等二十九軍



還成都 蜀主罷金州屯戍命王承勲等七軍還成都  
初唐僖昭之世宦官雖盛未嘗有建節者蜀安重霸  
勸王承休求秦州節度使承休言於蜀主曰秦州多美  
婦人請爲陛下采擇以獻蜀主許之庚午以承休爲天  
雄節度使封魯國公以龍武軍爲承休牙兵 乙亥蜀  
主以前武德節度使兼中書令徐延瓊爲京城內外馬  
步都指揮使延瓊以外戚代王宗弼居舊將之右衆皆  
不平

三年夏六月帝將伐蜀辛卯詔天下括市戰馬 秋

九月蜀主與太后太妃遊青城山歷丈人觀上清宮遂至彭州陽平山漢州三學山而還 丁酉帝與宰相議伐蜀威勝節度使李紹欽素諂事宣徽使李紹宏紹宏薦紹欽有蓋世奇才雖孫吳不如可以大任郭崇韜曰段凝亡國之將姦諂絕倫不可信也衆舉李嗣源崇韜曰契丹方熾總管不可離河朔魏王地當儲副未立殊功請依故事以爲伐蜀都統成其威名帝曰兒幼豈能

獨往當求其副旣而曰無以易卿庚子以魏王繼岌充  
西川四面行營都統崇韜充東北面行營都招討制置  
等使軍事悉以委之又以荆南節度使高季興充東南  
面行營都招討使鳳翔節度使李繼曦充都供軍轉運  
應接等使同州節度使李令德充行營副招討使陝州  
節度使李紹琛充蕃漢馬步軍都排陳斬斫使兼馬步  
軍都指揮使西京留守張筠充西川管内安撫應接使  
華州節度使毛璋充左廂馬步都虞候邠州節度使董

璋充右廂馬步都虞候客省使李嚴充西川管内招撫使將兵六萬伐蜀仍詔李興自取夔忠萬三州爲巡屬都統置中軍以供奉官李從襲充中軍馬步都指揮監押高品李廷安呂知柔充魏王牙通謁辛丑以工部尚書任圜翰林學士李愚竝叅預都統軍機蜀安重霸勸王承休請蜀主東遊秦州承休到官卽毀府署作行宮大興力役強取民間女子教歌舞圖形遺韓昭使言於蜀主又獻花木圖盛稱秦州山川土風之美蜀主將

如秦州羣臣諫者甚衆皆不聽王宗弼上表諫蜀主投  
其表於地太后涕泣不食止之亦不能得前秦州節度  
判官蒲禹卿上表幾二千言其略曰先帝艱難創業欲  
傳之萬世陛下少長富貴荒色惑酒秦州人雜羌胡地  
多瘴癘萬衆困於奔馳郡縣罷於供億鳳翔久爲仇讎  
必生釁隙唐國方通歡好恐懷疑貳先皇未嘗無故盤  
遊陛下率意頻離宮闕秦皇東狩鑾駕不還煬帝南巡  
龍舟不返蜀都彊盛雄視鄰邦邊亭無烽火之虞境內

有腹心之疾百姓失業盜賊公行昔李執屈於桓溫劉  
禪降於鄧艾山河險固不足憑恃韓昭謂禹卿曰吾收  
汝表侯主上西歸當使獄吏字字問汝王承休妻嚴氏  
美蜀主私焉故銳意欲行 冬十月排陳斬斫使李

紹琛與李嚴將驍騎三千步兵萬人爲前鋒招討判官  
陳乂至寶雞稱疾乞留李愚厲聲曰陳乂見利則進懼  
難則止今大軍涉險人心易搖宜斬以徇由是軍中無  
敢顧望者又薊州人也 癸亥蜀主引兵數萬發成都

甲子至漢州武興節度使王承捷告唐兵西上蜀主以  
爲羣臣同謀沮已猶不信大言曰吾方欲耀武遂東行  
在道與羣臣賦詩殊不爲意 丁丑李紹琛攻蜀威武  
城蜀指揮使唐景思將兵出降城使周彥禔等知不能  
守亦降景思秦州人也得城中糧二十萬斛紹琛縱其  
敗兵萬餘人逸去因倍道趣鳳州李嚴飛書以諭王承  
捷李繼曦竭鳳翔蓄積以饋軍不能充人情憂恐郭崇  
韜入散關指其山曰吾輩進無成功不復得還此矣當

盡力一決今饋運將竭宜先取鳳州因其糧諸將皆言  
蜀地險固未可長驅宜按兵觀釁崇韜以問李愚愚曰  
蜀人苦其主荒淫莫爲之用宜乘其人情崩離風驅霆  
擊彼皆破膽雖有險阻誰與守之兵勢不可緩也是日  
李紹琛告捷崇韜喜謂愚曰公料敵如此吾復何憂乃  
倍道而進戊寅王承捷以鳳興文扶四州印節迎降得  
兵八千糧四十萬斛崇韜曰平蜀必矣卽以都統牒命  
承捷攝武興節度使己卯蜀主至利州威武敗卒奔還



始信唐兵之來王宗弼宋光嗣言於蜀主曰東川山南  
兵力尚完陛下但以大軍扼利州唐人安敢懸兵深入  
從之庚辰以隨駕清道指揮使王宗勲王宗儼兼侍中  
王宗昱爲三招討將兵三萬逆戰從駕兵自綿漢至深  
渡千里相屬皆怨憤曰龍武軍糧餉倍於它軍它軍安  
能禦敵李紹琛等過長舉興州都指揮使程奉璉將所  
部兵五百來降且請先治橋棧以俟唐軍由是軍行無  
險阻之虞辛巳興州刺史王承鑒棄城走紹琛等克興

州郭崇韜以唐景思攝興州刺史乙酉成州刺史王承

朴棄城走李紹琛等與蜀三招討戰于三泉蜀兵大敗

斬首五千級餘衆潰走又得糧十五萬斛於三泉由是

軍食優足蜀主聞王宗勲等敗自利州倍道西走斷

桔柏津浮梁命中書令判六軍諸衛事王宗弼將大軍

守利州且令斬王宗勲等三招討李紹琛晝夜兼行趨

利州蜀武德留後宋光葆遣郭崇韜書請唐兵不入境

當舉巡屬內附苟不如約則背城決戰以報本朝崇韜

復書撫納之已丑魏王繼岌至興州光葆以梓綿劍龍  
普五州武定節度使王承肇以洋蓬壁三州山南節度  
使兼侍中王宗威以梁開通渠麟五州階州刺史王崇  
岳以階州皆降承肇宗侃之子也自餘城鎮皆望風款  
附天雄節度使王承休與副使安重霸謀掩擊唐軍重  
霸曰擊之不勝則大事去矣蜀中精兵十萬天下險固  
唐兵雖勇安能直渡劍門邪然公受國恩聞難不可不  
赴願與公俱西承休素親信之以爲然重霸請賂羌人

買文扶州路以歸承休從之使重霸將龍武軍及所募兵萬二千人以從將行州人餞於城外承休上道重霸拜於馬前曰國家竭力以得秦隴若從開府還朝誰當守之開府行矣重霸請爲公留守承休業已上道無如之何遂與招討副使王宗泐自文扶而南其地皆不毛羌人抄之且戰且行士卒凍餒比至茂州餘衆二千而已重霸遂以秦隴來降郭崇韜遺王宗弼等書爲陳利害李紹琛未至利州宗弼棄城引兵西歸王宗勲等

三招討追及宗弼於白芳宗弼懷中探詔書示之曰宋  
光嗣令我殺爾曹因相持而泣遂合謀送款於唐

十一月丙申蜀主至成都百官及後宮迎於七里亭蜀  
主入妃嬪中作回鶻隊入宮丁酉出見羣臣於文明殿  
泣下霑襟君臣相視竟無一言以救國患戊戌李紹琛  
至利州修桔柏浮梁昭武節度使林思諤先棄城奔閬  
州遣使請降甲辰魏王繼岌至劔州蜀武信節度使兼  
中書令王宗壽以遂合渝瀘昌五州降王宗弼至成都

登太玄門嚴兵自衛蜀主及太后自往勞之宗弼驕慢  
無復臣禮乙巳劫遷蜀主及太后後宮諸王于西宮收  
其璽綬使親吏於義興門邀取內庫金帛悉歸其家其  
子承涓仗劍入宮取蜀主寵姬數人以歸丙午宗弼自  
稱權西川兵馬留後李紹琛進至綿州倉庫居民已爲  
蜀兵所燔又斷綿江浮梁水深無舟楫可渡紹琛謂李  
嚴曰吾懸軍深入利在速戰乘蜀人破膽之時但得百  
騎過鹿頭關彼且迎降不暇若俟修繕橋梁必留數日

或教王衍堅閉近關折吾兵勢儻延旬浹則勝負未可知矣乃與嚴乘馬浮渡江從兵得濟者僅千人溺死者亦千餘人遂入鹿頭關丁未進據漢州居三日後軍始至王宗弼遣使以幣馬牛酒勞軍且以蜀主書遺李嚴曰公來吾卽降或謂嚴曰公首建伐蜀之策蜀人怨公深入骨髓不可往嚴不從欣然馳入成都撫諭吏民告以大軍繼至蜀君臣後宮皆慟哭蜀主引嚴見太后以母妻爲託宗弼猶乘城爲守備嚴悉命撤去樓櫓已酉

魏王繼岌至綿州蜀主命翰林學士李昊草降表又命  
中書侍郎同平章事王鉞草降書遣兵部侍郎歐陽彬  
奉之以迎繼岌及郭崇韜王宗弼稱蜀君臣久欲歸命  
而內樞密使宋光嗣景潤澄宣徽使李周輅歐陽晃熒  
惑蜀主皆斬之函首送繼岌又責文思殿大學士禮部  
尚書成都尹韓昭佞諛梟於金馬坊門內外馬步都指  
揮使兼中書令徐延瓊果州團練使潘在迎嘉州刺史  
顧在珣及諸貴戚皆惶恐傾其家金帛妓妾以賂宗弼



僅得免死凡素所不快者宗弼皆殺之辛亥繼友至德陽宗弼遣使奉牋稱已遷蜀主於西第安撫軍城以俟王師又使其子承班以蜀主後宮及珍玩賂繼友及郭崇韜求西川節度使繼友曰此皆我家物奚以獻爲留其物而遣之李紹琛留漢州八日以俟都統甲寅繼友至漢州王宗弼迎謁乙卯至成都丙辰李嚴引蜀主及百官儀衛出降於升遷橋蜀主白衣銜璧牽羊草繩縈首百官衰絰徒跣輿觀號哭俟命繼友受璧崇韜解縛

焚觀承制釋罪君臣東北向拜謝丁巳大軍入成都崇  
韜禁軍士侵掠市不改肆自出師至克蜀凡七十日得  
節度十州六十四縣二百四十九兵三萬鎧仗錢糧金  
銀繒錦共以千萬計高季興聞蜀亡方食失匕箸曰是  
老夫之過也梁震曰不足憂也唐主得蜀益驕亡無日  
矣安知其不爲吾福楚王殷聞蜀亡上表稱臣已營衡  
麓之間爲菟裘之地願上印綬以保餘齡上優詔慰諭  
之十二月癸酉王承休王宗泐至成都魏王繼岌

詰之曰居大鎮擁彊兵何以不拒戰對曰畏大王神武  
曰然則何不降對曰王師不入境曰所俱入羌者幾人  
對曰萬二千人曰今歸者幾人對曰二千人曰可以償  
萬人之死矣皆斬之并其子 閏十二月丁酉詔蜀

朝所署官四品以上降授有差五品以下才地無取者  
悉縱歸田里其先降及有功者委崇韜隨事獎任又賜  
王衍詔略曰固當裂土而封必不薄人於險三辰在上  
一言不欺

明宗天成元年春正月庚申魏王繼岌遣李繼曠李嚴  
部送王衍及其宗族百官數千人詣洛陽 三月乙

巳王衍至長安有詔止之 三月伶人景進等言於

帝曰魏王未至康延孝初平西南猶未安王衍族黨不  
少聞車駕東征恐其爲變不若除之帝乃遣中使向延  
嗣齎勅往誅之勅曰王衍一行竝從殺戮已印畫樞密  
使張居翰覆視就殿柱揩去衍字改爲家字由是蜀百  
官及衍僕役獲免者千餘人延嗣至長安盡殺衍宗族

於秦川驛衍母徐氏且死呼曰吾兒以一國迎降不免  
族誅信義俱棄吾知汝行亦受禍矣 夏六月蜀百  
官至洛陽永平節度使兼侍中馬全曰國亡至此生不  
如死不食而卒以平章事王鉞等爲諸州府刺史少尹  
判官司馬亦有復歸蜀者


三年夏六月陝州行軍司馬王宗壽表請塋故蜀主王  
衍秋七月乙巳贈衍順正公以諸侯禮塋之

通鑑紀事本末卷四十下

謹案卷四十下第二十三頁前八行實刺鄂博舊  
作撒刺阿撥今改後仿此







總校官庶吉士臣張能照

校對官編修臣莫瞻菴

膳錄監生臣張槎